

東  
華  
續  
錄

東華續錄

咸豐十

臣王先謙敬編

臣陶濬宣恭校

秋七月乙酉朔諭內閣薩迎阿奏甘省營務廢弛籌議責成提鎮實力整頓等語昨據琦善奏番賊復出搶掠已有旨令該署督嚴飭鎮將跟蹤剿捕野番頻年肆搶官兵前往追捕未能得力甚至退縮不前總由該省營務廢弛已久歷任總督粉飾消弭以致養癰成患寔堪痛恨番匪出沒深山兵少則抗拒兵多則逃竄設卡巡防嚴密偵探最爲要務著卽責成該提鎮平日嚴督將弁認真操練兵丁飭令防守弁兵隨時確探如有野番出掠飛速傳報該提督迅派將弁帶兵趕捕該鎮卽親帶弁兵馳往堵剿必須立時加以懲創使野番知畏不敢輕出肆劫並通飭地方文武查拏內

地奸民毋令勾結應以淨根株薩迎阿見署總督距裕泰到任  
爲日尙遙恐秋間賊番復出劫掠滋事著會同提督索文嚴飭各  
鎮隨時認真防範並將廢弛積習寔力整頓不准再蹈從前欺飾  
故智致干重譴儻將弁仍前玩泄奉行不力著嚴參懲辦○丙戌  
諭內閣前據徐廣縉葉名琛許乃釗奏南海縣西湖書院暨東莞  
縣士子因公項命案之嫌聲言罷考已降旨暫停考試茲據該督  
等奏稱倡議罷考之人多係刁徒藉端生事其安分生監不在其  
列等語見在鄉闈伊邇多士有志觀光未便因一二刁健之徒致  
阻良善進身之路著照所請所屬西湖書院及東莞一縣生監等  
俱著准其一體鄉試其倡議罷考之人仍著嚴拏究辦以示勸懲  
○諭前據徐廣縉奏稱已革右江鎮總兵惠慶功多過少當經降  
旨交資尙阿確查茲據查明惠慶曾經打仗有功無過畱心營務

行軍頗有紀律賊入西林縣城時正當該鎮在上林墟剿匪地距數百里鞭長莫及並非託名防堵延不赴援惠慶著加恩賞給二品頂戴以總兵候補畱於軍營交賽尙阿差遣委用以觀後效○諭見在徐廣縉前赴高廉一帶督辦軍務所有廣東剿捕事宜卽著徐廣縉專辦至廣西省亦係該督兼轄之區其有交涉事件著與賽尙阿互相知會毋致兩歧○賽尙阿奏象州中坪一帶逆匪於六月初四等日竄回東鄉舊巢並擾桂平縣之新墟烏蘭泰向榮等連日追剿斃賊多名初八日賊越嶺分走小路兵壯施放槍礮連斃多匪初九日我軍進偪東鄉斃賊數十人烏蘭泰督放火箭向榮策馬當先手執烏槍擊斃執旗賊二人坐騎中礮守備蔡應龍換給馬匹該守備步行短兵接戰斃賊三人該匪敗回村內固守不出又奏巨黨何名科糾黨五六千人踞信宜縣安鵝地方

距北流縣境五十里四出焚掠署北流縣知縣阮正惠召募丁壯並諭團練齊心堵禦五月十三日賊二百餘人竄入新豐外委石中寶團總監生蒙禮和等率領練丁圍擊殺賊多名是夜又有賊三百餘人竄至文頭嶺等處經團總監生廖英千總黃遇陞等帶兵攻擊該匪逃竄計先後疊次殺賊多名生擒百餘名會匪凌十八踞東省化州平定墟距北流甚近聞安鵝逆匪挫衄卽於十三日逃遁臣飭各文武奮力追勦務期弋獲上諭軍機大臣等該匪乘大軍尙未到齊卽由象州回竄東鄉自係畏懼聲威負隅走險第恐其南合凌十八等股匪則黨與更眾勦辦尤爲棘手該大臣密札桂平平南貴縣一帶嚴防江口並令候補知府劉繼祖帶領水勇防其偷渡分遣巴清德達洪阿各帶官軍兩路會赴潯川策應諒烏蘭泰向榮等有此聲援卽可設法誘其出巢併力攻

勦務須前截後追勿令句結蔓延見在新調官兵計可全數抵粵該大臣擬用全力攻勦會匪大股藉生力之兵可期得手以次分勦各路並激勵團練冀收實效甚合機宜應如何調遣防勦之處朕亦不爲遙制此次賊匪竄回舊巢究係分作幾股仍須防其聲東擊西誘我南向乘虛北撲致我兵又成尾追之勢所查各文武稟報股匪九處卽著分飭在事員弁度地相機併力兜捕早清一股賊匪卽早安一路生靈想該大臣與朕同心不煩諄諭也惠慶已明降諭旨以總兵候補其德亮是否堪資任使仍著隨時察看據實具奏本日又據徐廣縉等奏高廉一帶賊匪竄擾該督已於六月二十六日馳赴該處勦辦已諭令該督專辦東省堵勦事宜仍隨時咨報該大臣並嚴防西省逸匪竄入以冀勦力同心肅清邊圉將此由五百里諭知賽尙阿並諭巴清德達洪阿烏蘭泰向

榮知之○諭徐廣縉葉名琛奏遵查高廉賊匪情形及曾大生股匪一摺信宜縣賊首凌十八奔竄兩省肆行滋擾亟應嚴拏懲辦毋任遠颺署茂名縣知縣胡宗政前聽紳耆之言將凌十八之弟凌廿四保釋見經該督等將胡宗政撤任訪查務期徹底根究毋任蒙混其踞住安鵝之股匪何名科屢經兩省夾攻翦除黨與並將其母女妻子生擒解省惟何名科見在逃往何處仍著嚴飭緝拏務獲見在徐廣縉前赴高廉一帶督辦軍務葉名琛畱省辦理文武鄉試所見甚是葉名琛於鄉試事竣後仍著駐省就近調度將此由四百里諭令知之○賽尙阿奏報粵匪情形並請寬期剿辦得旨卿之調度甚合機宜殊堪嘉尙朕心已深慰矣俟新兵到齊從容妥辦汝之性情稍急身體須加意保重至應何處添調何處防剿朕亦不爲遙制卿之忠悃朕鑒之亦天下所共知者○以

追勦東鄉賊匪獲勝賞還提督向榮花翎餘升擢有差○丁亥諭  
內閣鄒鳴鶴奏遵查廣西省道光三十年實欠在民錢糧懇請豁免等語廣西省被賊擾累節經降旨加恩期與吾民休息何忍更  
事追呼所有道光三十年民欠地丁錢糧著該撫查明確數開單  
具奏准其豁免其前請緩徵案內聲明照常徵收之三十年應徵  
本折米石官穀並著查明如有輸將拮据之處據實具奏准其一  
體豁免以紓民力該撫卽刊刻謄黃先行曉諭俾邊圉窮黎豫知  
朝廷德意用慰朕念○戊子允裕奏奏酌定福建保甲章程○己  
丑諭內閣奕山毓書布彥泰奏遵議滿洲營添考鳥槍酌擬考驗  
章程並綠營一律辦理一摺據稱伊犁烏魯木齊兩處滿洲營兵  
丁向係兼習鳥槍著卽責成該將軍都統等照舊教演毋令日久  
生懈其考驗官缺一節前據兵部會同八旗都統覈議具奏業經



降旨各駐防旗員來京考驗加看鳥槍之處毋庸置議該將軍所請協領等員由部考驗鳥槍未能合式卽令暫回本任停其升轉保舉勒限勤習未免事涉紛繁著仍遵前旨務循舊制不必另議更張至伊犁所屬之錫伯索倫察哈爾額魯特四愛曼或專習騎射或向習杈子槍若另改其素習轉非用其所長所見甚是亦著仍循舊章辦理至伊犁烏魯木齊所屬之綠營各員送部考驗與旗營事同一律均著毋庸另議章程另片奏伊犁滿洲營籌款添造槍礮伊犁鎮標捐造擡礮長矛等件請免造冊報銷及歲需操演鉛丸火藥請照例報銷等語俱著照所擬辦理○庚寅諭內閣給事中焦友麟奏吏治因循亟宜綜覈名實一摺各省大吏有察吏安民之責卽如緝捕一端疊經申諭力求整頓之方若如該給事中所奏近來四川之啞匪河南之捻匪湖南之齋匪湖北之痞

匪以及山東兗沂曹安徽廬鳳潁地方匪徒結黨成羣幾於所在皆有若不力加搜捕何以除莠安良著該督撫等各飭所屬文武嚴密查拏以期消患未形毋得因循坐誤並著於年終將特旨交辦事件並拏獲盜案除辦結外其未完若干案分晰開單並將見辦情形具奏以備查覈至於辦事之遲速獲案之多寡即可驗屬吏之勤惰該督撫等如果表率有方吏治必有起色奸宄何至潛蹤斷不可仍前玩泄自蹈愆尤負朕諄諄訓誡之意也將此通諭知之○諭御史雷維翰奏吏治疲敝訐告成風請申明舊例一摺近來各省被劾人員往往投遞呈詞藉端挾制訐告之案層見疊出如被劾之員果有冤抑原許其據實申訴若於被劾本案之外摭拾別項款蹟砌詞聳聽顯係懷挾私仇藉圖報復而該管上司等恐被訐告遂多徇隱或於開缺之後始行糾參或於已參之後

復爲消弭以致刁劣屬員肆無忌憚尙安望其整飭官方耶嗣後如有被參人員以不干己事訐告上司以圖報復者內外問刑衙門著照定例立案不行仍分別治罪以杜挾制各省督撫以下凡有表率之責者如果各勵廉隅奉公守法自立於無過之地俾該屬員無瑕可指亦何至啟反噬之漸惟當激發天良潔己率屬不可因豫防挾制隱忍姑容亦不得因有立案不行之條恃爲無人發覆遂不自加檢束也至各省遇有特旨查辦之案均應徹底根究迅速清釐毋得回護遷就轉致稽延庶大法小廉而劣員亦知所懲儆於吏治人心均有裨益將此通諭知之○辛卯浙江學政吳鍾駿奏甯波府城諸夷雜處左道易惑見飭各學教官於鄉鎮中勸立義學以正人心報聞○癸巳諭軍機大臣等昨據駱秉章奏查探兩粵賊蹤及防堵情形據稱廣西賀縣賊匪竄回懷集縣

大竹埔與湖南江華縣壕界毗連廣東賊匪分竄樂昌縣平石市及陽山縣白虎墟亦與湖南宜章臨武二縣鄰近業經該提鎮添兵協堵並飭各該營縣雇募勇壯一律嚴防本日據吳文鎔張亮基奏粵西賊匪竄入滇省廣南府境當經弁兵練勇剿殺多名餘匪潰散滇省既有粵匪竄擾湖南毗連處所尤爲喫重前有旨令程喬采馳往湖南防剿著卽會同該撫嚴飭地方文武於楚粵交界要隘分投防堵不得以兩粵逸匪距境稍遠遂形疏懈儻防堵不嚴致賊匪乘閒竄入楚境勾結蔓延惟該督撫是問將此諭令知之○諭吳文鎔張亮基奏粵匪竄入滇省廣南府境經兵練剿捕潰逃見在添兵防堵一摺雲南廣南府三面界連粵西先經該督撫飭屬嚴防四月下旬有西林縣賊匪二百餘人竄至距府城一百五十里之者孟上下兩寨地方滋擾當經兵勇剿捕格斃十

八名生擒五名餘匪潰逃仍竄回西林縣境據稱地方居民尙未被其蹂躪但滇粵犬牙相錯必須嚴加堵截方不至越境蔓延該督撫見已派員添兵防守著卽嚴飭地方文武於交界要隘實力查拏毋稍疏忽雲南既有粵匪竄擾貴州各屬毗連處所尤爲喫重並著喬用遷於黔粵交界一律嚴防勿懈其雲南邱北一帶夷舊之黑沙人春間曾有竄入粵省邊界搶掠之事著隨時嚴拏懲辦勿令復出滋事以杜勾結將此各諭令知之○乙未諭內閣戶部錢法堂奏滇銅解運遲延已酉未到三運或甫入東境或甫抵清江庚戌六運均無確信恐緩不濟急等語銅運攸關鼓鑄似此節節耽延必致遲逾貽誤疊經降旨飭催仍著沿途各督撫及派出之藩臬各員並河漕各總督不分畛域一體飭屬嚴催務令趕緊運京以資鼓鑄毋任遲延儻各該運員任意逗遛或沿途地方

官不能實力催趲卽著指名嚴參懲辦○庚子竇尙阿奏新墟股賊韋政卽在其內後路東鄉之賊係馮雲山爲首已入紫金山連日據烏蘭泰呈報六月二十七日令經文岱張敬修等由馬鞍嶺鷄公嶺進攻新墟莫村東面李能臣王錦繡等由新羅塘襲窰進攻新墟東南面上瑤十八村團練千餘人進至羅旺過河直撲新墟聽護甲地方號礮火箭爲號烏蘭泰同總兵秦定三由思盤過河知會李瑞王夢麟等嚴堵古城坳鵬化隘口以防賊竄嗣查明護甲積沙壅聚可以淺涉其地卽莫村賊巢後面烏蘭泰由護甲潛行過江二十七日甫經接仗匪卽退走烏蘭泰知彼處有竹園村竹木叢雜最便埋伏先令秦定三伏兵其處果見賊由對面平岡盪擁而出直趨竹園秦定三用礮攻打一食頃閒賊屍徧地趁勢窮追匪徒拌死回關烏蘭泰激勵兵勇愈戰愈奮直至莫村巢

定又殲匪數百名除四散奔竄外全數遁入新墟天已昏黑撤兵回營計共殲匪二三千人此二十七日連次獲勝情形也達洪阿所帶之兵於二十八日可抵潯州俟生力弁兵會合再圖進剿又奏六月十一日賊二千餘人由思盤搶渡被團練擊退復由盤龍河偷渡李孟羣會商守備李進榮帶兵堵截下游親帶練丁八百餘人馳赴盤龍水口見韋政手執白扇其餘頭目執黃旗吶喊而來李孟羣督飭壯丁連放巨礮斃賊四十餘人次日該匪又欲偷渡守備李進榮督同把總劉正林帶兵抵擊適左江道楊彤如潯州府張其翰添派壯勇到齊十三日該匪二千餘人在田坡排列旗礮分伏竹林我兵四路並進放礮夾攻賊退入上龔村逃竄各兵勇奮力剿殺斃賊百餘生擒二十餘該署令李孟羣實爲出力懇將該員以知府升用先換頂帶守備李進榮把總劉正林以應

升之缺升用又奏准撫

臣

鄒鳴鶴咨據革道林士傳稟稱逆匪曾

亞涓等餘黨一由粟塘連山逃去一仍竄賀縣都江流冲一帶該  
道由官潭移紮賀縣催督各路兵勇合力剿堵該匪於五月二十  
日翻山出川洞口欲過河竄往大凝經富賀營兵勇分投堵禦遂  
竄往沙黃牛角寨附近連山境界各兵勇復分路追捕該匪勢蹙  
於六月初一日翻山竄出桂嶺偷渡過河兵勇追躡初二日在格  
思營楓木腳等處疊將該匪痛剿擊斃五十餘人生擒二十餘人  
餘匪往里松黃田一帶奔竄其由粟塘逃去一股據該革道轉據  
懷集縣張凱嵩等稟稱曾亞涓已於六月十五日在廣甯縣扶溪  
口就獲業經廣甯縣審解

臣

查曾亞涓與溫大貨五糾匪竄擾拒

捕戕官五月內溫大貨五已獲茲該犯亦復就擒餘匪搜除殆盡  
該革道林士傳尙知奮勉見當潯梧各屬勦辦需人之際賀懷等



處漸臻安謐擬令該員前往梧州防勦懇賞給五品頂帶以資彈壓又奏劉入一股眾至逾萬積年竄擾博白合浦等處茲據博白縣升任知縣游長齡會同在籍前任黎平府知府朱德璉稟稱劉入竄沙河經廣東官兵大創後復由花石竄野鴨塘該縣等追捕至松山龍潭等處劉入由合浦公館墟一路逃竄又由合浦沙堡墟渡江潛往龍門等處當派生員王汝諧等帶練追捕劉入妻李氏抱幼子藏匿合浦博白交界東埔山內職員游居誠帶練技捕十七日在東埔竹殼嶺搜獲劉入妻子並隨行賊匪四名又據王汝諧等回稱劉入逃往合浦北塞墟左近被東省鄉勇盤獲解赴合浦縣審辦統計此次續報各處練壯殺賊五百三十餘名生擒著名賊目及偽先鋒等多名就地正法劉入妻子收禁聽候辦理臣查劉入滋事以來煽惑萬眾竄亂東西兩省罪大惡極該升縣

同知府朱德璫董率紳民練勇會同東省官兵攻擊埽穴擒渠朱德璫游長齡請旨賞戴花翎再該縣團練最爲得力見當通省舉行團練之際懇恩准將肇慶府知府游長齡開缺作爲卽補知府暫畱廣西辦理團練及勦捕善後各事宜均有裨益 上諭內閣逆匪曾亞湍竄擾兩省經已革道員林士傅分飭文武帶領兵勇疊次追勦斃賊多名復轉據懷集縣報在廣甯縣扶溪口將曾亞湍擒獲此次兩省合勦首犯就擒餘黨搜捕殆盡該革道等辦理尙爲奮勉林士傅著賞給五品頂帶飭令前往梧州防勦○諭逆首劉八連年竄擾廣西博白縣及廣東合浦縣交界地方經知縣游長齡等董率紳民練勇與廣東官兵合力兜拏將著名賊目及僞先鋒等拏獲又拏獲劉八妻子至逆首劉八已由廣東合浦縣擒獲該逆首屢次煽眾抗拒戕害官兵罪大惡極茲經兩省文武

紳勇會同攻剿將此大股一旦殲除洵足伸國法而快人心游長齡辦理團練認真出力朱德璉率領有方均著加恩賞戴花翎游長齡業已升任廣東肇慶府知府著開缺作爲卽補知府畱於廣西董辦團練及剿捕各事宜其廣東合浦縣拏獲劉八係屬何人並著徐廣縉等查明具奏候朕施恩○諭軍機大臣等據賽尙阿馳奏進剿新墟大股賊匪七獲勝仗一摺另片奏會剿股匪將逆犯劉八曾亞涓擒獲夥黨殲除殆盡又地方文武由水路防剿賊匪各情形覽奏實深欣慰此次東鄉新墟大股會匪經烏蘭泰等督帶弁兵分路進攻一日之間連獲七勝殲賊二三千人賊鋒大挫該大臣調度有方烏蘭泰督率在事文武謀勇兼施從此乘機痛剿何難剋日殲除烏蘭泰於獲勝回營後次日當已進兵向榮由後路攻入達洪阿所帶之兵亦可馳到諒已續獲全勝奏報在

途矣會匪韋政係屬渠魁必當設法殲除勿令免脫至馮雲山爲東鄉賊首見在竄入紫荊山恐其翻越滋擾尤當趕緊兜截毋使逆餒復張該逆匪等詭詐性成我軍乘勝追擊萬勿稍存大意墮其奸謀是爲至要其劉八曾亞渴二犯業經廣東擒獲惟凌十八一股前據單開逃至化州平定墟地方兩省文武見在如何勦辦著卽飛咨東省合力會勦此股亦係著名兇狡會匪卽當趁此殲擒勿畱餘孽將此由五百里諭知寶尙阿並諭令巴清德達洪阿烏蘭泰向榮知之○河南巡撫潘鐸奏欽奉諭旨飭將河南擒匪橫肆情形及見在籌畫事宜明白回奏查豫省南汝光等處民風强悍匪徒結捻成習最爲民害臣於上年巡閱營伍時訪有喬建德等糾結匪類於泌陽縣鄉村勒詐情事當飭南陽府知府葉法督飭所屬嚴密查拏並勸諭紳民自爲保衛本年四月間臣聞泌

陽縣有匪徒宋紹德滋事喬建德仍在其內隨將查出名單嚴飭  
南陽府知府並咨會南陽鎮臣督飭縣營擒捕乃僅獲從犯二名  
並未將喬建德等緝獲縣營相率因循已成積習是以從嚴將督  
緝之知府守備奏參摘頂係爲振作捕務起見實非敢於事隔一  
年始以一參塞責奏參之後節據該府稟報獲犯四十餘名並獲  
另案著名捻首宋紹德等惟匪徒此拏彼竄往往倖逃卽如原奏  
內稱喬建德匪黨盤踞角子山攔路搶劫道路梗塞一節查角子  
山與唐縣桐柏確山等縣及湖北隨州連界不通大道路徑叢雜  
深險之處車馬不能容實爲逋逃淵藪其泌陽縣春水鎮白貓垛  
等處卽附近角子山之側該府見在沙河店各處緝捕節據稟報  
地方安靜並未有聚集匪眾情事臣仍當督飭南陽鎮總兵圖塔  
布南汝光道鄭敦謹上緊搜捕務令全數弋獲又原奏內稱泌陽

縣擒匪數百人一日搶掠十數家殺斃事主七人及唐縣擒匪千餘人肆行焚搶幾致圍城各節均未據該縣及該管道府稟報俟查明如有諱匿情事從嚴參辦又原奏內稱南召縣擒首李大李二率匪千餘將陳姓家搶劫知縣畏葸不辦事主奔訴鄰境裕州知州姚慶溥率領兵壯往捕該匪放礮抗拒緝獲李大一節查南召縣詳報本年二月初三日事主監生李中嶽家被劫已獲首從要犯三人適裕州知州姚慶溥因公在省就近私查據稟實無代南召縣捕擒之事又原奏內稱臣前參南陽府知府葉法經臣飭拏喬建德竟以姓名相同之皮匠解省塞責一節查上年六月間姚慶溥拏獲喬旺誤認爲喬建德於到案後卽經訊明並非南陽府葉法誤拏臣前因南陽府文武緝捕不力專摺參奏亦無誤拏擒首之語謹將大概情形及有卷可查者先行據實具奏 上諭

擒匪結黨肆擾最爲閭閻之害全在該大吏平時加意訪查嚴拏懲辦庶可弭患於未形若至釀成巨案尙以未據屬員稟報爲辭則不肖州縣規避處分多方諱飾何所忌憚安民以察吏爲先豈民生疾苦僅憑屬吏一紙稟報聽其欺蒙耶外官習氣沾染殊深著潘鐸遵照前旨將各案匪犯遴派幹員分路捕拏嚴行究辦務使地方靜謐不至別滋事端其該地方官有諱匿畏葸等情查明據實嚴參若官官相護代爲諱飾潘鐸之咎更重矣懍之將此諭令知之○以攻勦新墟獲勝賞副都統烏蘭泰花翎賞還總兵官秦定三花翎擢知縣李孟羣以知府用餘升敘有差○辛丑諭內閣御史宗稷辰奏實行保甲事宜十條保甲爲弭盜良法向例編查完竣年終彙奏一次原以昭覈實而期經久乃近來沿爲具文有名無實節經降旨通飭妥辦該御史所奏久任一條古之郡守

牧令行一善政動須數載惟能始終其事是以立法周詳今之州縣雖不能不因地量材以時遷調至於興利除弊實非旦夕可期卽如辦理保甲亦須寬其時日俾得從容奏效儻責之太急勢必草率從事以爲見長地步上司不加查察被其蒙混致開濫保之端非徒無益又滋流弊至所稱填寫門牌宜詳細覈對董事胥役毋派費累民及酌用丞簿等官以資襄助分編巨族小姓以爲聯屬並可申明讀濶之典兼收團練社會之益所奏各條如果實力奉行地方必臻安謐著各直省督撫各就該處情形詳加體察參酌行之但不得視爲故事徒託空言其或循良之吏規畫於前庸劣之員廢弛於後則徒法不行終歸無濟惟在封疆大吏知人善任使良法美意經久不渝於吏治民風庶有裨益也將此通諭知之○壬寅諭內閣昨據賽尙阿奏殲除賊匪曾亞涓一股已降旨



著徐廣縉等查明擒獲該匪人員卽行保奏矣茲據該督撫奏稱廣甯夥匪曾亞涓經潮州兵勇痛剿分股逃竄屯踞橫石墟衛佐邦督飭弁兵分作兩隊先後進發繞至墟外施放連環槍礮該匪力不能支盡從後路翻山竄逸經李敦業督同署廣甯縣知縣程兆桂並該管營汛帶領兵勇於十七日在廣甯之扶溪地方將曾亞涓及夥黨十一名擒獲並另股糾夥之曾土生等亦先後全行拏獲其竄入都江各匪復經前廣西鹽法道林士傳拏獲殆盡該匪竄擾兩省閱時已久茲得掃除淨盡洵足以伸國法而快人心該督等督飭地方文武合力協剿辦理實屬認真所有在事出力文武各員著卽查明保奏候朕施恩其節次陣亡弁兵壯勇一併查明交部議卹○諭軍機大臣等徐廣縉等奏剿辦會匪凌十入一股由西省竄回信宜之懷鄉墟經總兵楊昌潤知府胡美彥於

六月初五月初七日兩次進剿殲擒百餘名焚燒賊巢十餘間因賊眾兵單未能痛加剿洗是此次接仗情形未甚得力該匪等聲勢相倚凌十八一日不除則韋政得藉資援應西省剿辦亦難得手且尙有何名科一股首匪未獲一經嘯聚勾結必致到處蔓延該督見既飛調潮州兵勇及提標各弁兵親往督剿務將各股迅速撲滅總期於兩省毗連處所嚴飭文武分堵夾攻不得再令該匪東西竄擾該督見駐高州一帶所有剿辦一切情形諒已隨時知照賽尙阿和衷妥辦不誤機宜也再前據駱秉章奏探得廣東英德曲江一帶有賊千數百人分起行走又連州屬之陽山縣白虎墟一帶有游匪二百餘人竄擾均五月內之事與湖南地界毗連並著該督撫查明此二股賊匪見在如何情形該地方文武如何剿捕曾否淨盡徐廣縉見赴高州著葉名琛就近查辦迅速撲

減毋致滋蔓爲要將此由四百里各諭令知之○癸卯 御製述  
志詩示在廷諸臣曰大廷循典觀公卿 考訓親承戒滿盈愼厥  
修身四時懷審於出治一心明屏私圖己兼援友盡敬愛君必澤  
氓宵旰勵精期共勉閉邪陳善竭丹誠又於詩註內訓諭廷臣曰  
朕自幼卽渥蒙 皇考誨育深恩追膺 付託之重 諄諄以奉  
三無私保泰持盈爲勛 言猶在耳敢不銘心是用愼厥身修克  
自抑畏審於出治以正朝廷爾諸臣亦當知爲臣不易思日贊襄  
屏圖己援友之私庶期公溥務愛君澤氓之實力戒因循陳善閉  
邪勵精圖治宵衣旰食朕志不渝茲於御門聽政援筆成吟爾諸  
臣其共體朕意毋蹈積習實有厚望焉○調任安徽巡撫王植奏  
拏獲安徽捻匪高四八孜等審辦得旨嚴行審辦務期淨絕根株  
斷不可含混了事此旨著傳知蔣文慶○命前任福建巡撫徐繼

畚以四品京堂候補○乙巳諭軍機大臣等有人奏湖南衡永寶三府郴桂兩州以及長沙府之安化湘潭瀏陽等縣教匪充斥有紅簿教黑簿教結草教斬草教捆柴教等名目每教分溫良恭儉讓五字號每號總領數百人至數千人又有齋匪名曰青教皆以四川峨眉山會首萬雲龍爲總頭目所居之處有忠義堂名號其傳徒皆用度牒蓋以圖記聲勢聯絡往來各處皆供給銀錢飯食每月按三六九期赴會頭目乘轎騎馬動輒數百人搶奪淫掠無所不至地方官不敢撻鋒遇有呈報會匪字樣偪令更換呈詞或改盜爲竊反將事主收押陵虐遂致匪燄愈熾又寶慶府之邵陽新化武岡等處教匪以阻米出境爲名肆行搶奪各等語匪徒擾害閭閻總由地方官不能覺察於先又復容隱於後似此黨徒充斥若不早絕其源必致蔓延勾結著程裔采會同駱秉章按照摺

內所指各情嚴密訪拏務期消患未然勿使釀成巨案見已諭令  
徐澤醇訪拏峨嵋山會首如該省訪獲要犯訊出情形卽密咨四  
川一體查辦又據片奏該匪傳教惑人有性命圭旨及冰潛傳兩  
書湖南各處坊肆皆刊刻售賣蠱惑愚民莫此爲甚並著該督撫  
督飭地方官嚴行查禁將書板盡行銷燬仍當嚴飭各屬勿令吏  
胥藉端滋擾原摺片著鈔給閱看將此諭令知之○諭有人奏湖  
南地方教匪充斥以四川峨嵋山會首萬雲龍爲總頭目等語湖  
南與四川接壤該省會匪甚多朕早有所聞節經降旨令湖南省  
嚴密查訪該匪徒等傳徒布黨必有總頭目爲之首倡以致煽惑  
日眾前據該督徐澤醇覆奏訪查綦江匪徒馬武成並無其人今  
復有人奏峨嵋山藏匿會首之事此等匪徒行蹤詭秘姓名既可  
改易地方亦可遷移委查之員或稍不盡心或意圖省事輒以查

訪無蹤一稟塞責切不可受其欺蒙著徐澤醇按照此次所奏各情遴委委員嚴密訪查固不可張皇滋擾亦不准諱飾養奸萬雲龍一犯如有其人必當立拏嚴訊並可將究出徒黨知照湖南一體查辦務須淨絕根株勿貽後患原摺著鈔給閱看將此諭令知之○丙午諭內閣靈桂自簡任總管內務府大臣以來察其言動頗覺高興見值恭辦 昌西陵工程輪應住班因病未往本日銷假召見據奏稱伊合家患病伊母近因初喪幼孫殊深軫悼並稱奴才至工次察看懇恩俟八月初間仍同魏元烺回京我 皇上以孝治天下諒無不允准之理其母患病與否自闕於心可知已屬怠情偷安意存挾我宗室中從未有似伊無恙意者又奏稱阿靈阿病尙未痊吉倫泰有赴 陵差使可否令吉倫泰就近照料其意卽欲令吉倫泰在彼住班尤屬膽大妄言居心詐僞靈桂

惟知眷戀妻孥全不以公事爲重卽此一節已應立予罷斥第念  
伊歷練未深姑示薄懲靈桂著毋庸辦理 陵工並革去工部左  
侍郎總管內務府大臣仍畱正紅旗蒙古副都統令伊痛改前非  
盡除委靡之習仍可再邀恩眷也○諭前因兩江總督陸建瀛奏  
請崇正學以黜邪教當經降旨飭令各省地方課士授徒均以  
御纂性理精義 聖諭廣訓爲講習之本良由士爲民倡士習端  
則民風自歸淳正近年兩廣盜賊肆行據奏多係會匪煽惑鄉曲  
愚氓習聞異說致罹法網朕甚憫焉因思正人心必先息邪說息  
邪說必先廣化導恭讀 皇考宣宗成皇帝欽定敬闡 聖諭廣  
訓黜異端以崇正學一條四言韻文語簡意賅允足警覺冥頑俾  
知感悟從前曾奉 諭旨頒行直省大小官吏自必敬謹奉行第  
恐日久視爲具文而窮鄉僻壤又未能家置一編人人誦習茲特

親書一通命武英殿勒石搨印頒行天下各直省將軍督撫府尹  
學政督飭地方文武官員及各學教官欽遵宣布無論官紳士庶  
均准摹勒刊刻以廣流傳俾山陬海澨鄉塾顓蒙口誦心維滌瑕  
蕩穢咸曉然於名教之可樂邪說之難容父師以是爲教子弟以  
是爲守正道旣明羣情不惑一切妄誕之言無從煽誘薄海蒼黎  
涵濡 聖化風俗蒸蒸日上朕實有厚望焉將此通諭中外知之  
○賞已革吏部尙書文慶五品頂帶命辦理 昌西陵工程○以  
德興爲工部左侍郎署吏部左侍郎○汪本銓以親老免調椿壽爲浙江  
布政使以恆福爲湖南布政使周啟運爲直隸按察使由通永道遷○  
丁未諭內閣工部奏南河西隄工程銀兩是否仍令造冊報銷請  
旨遵辦等語此項工程銀兩著仍遵前旨免其造冊報銷至南河  
工用議定每歲以三百萬兩爲率不准於定數之外任意浮加該



河督務當實力撙節於借墊攤還之款仍須認真稽覈毋得因邀免報銷遂致工程草率帑項虛糜又滋流弊○己酉諭內閣陸建瀛楊以增奏南河工需情形等語見在甫交秋汛河湖水勢消長無定惟當加意防護不可稍失機宜至需用款項如果實係緊急自應豫爲籌備但須力求撙節不可開浮濫之端著該督隨時察看情形覈實奏辦其所稱向來遇閏之年均著添請銀兩之處著該部查議具奏尋奏查南河歷次遇閏舊案或因黃運兩河異漲或因運河兩岸要工皆係豫籌要需並非專爲遇閏請撥不得援以爲例河工錢糧原以工程之大小爲憑非以日數之多寡爲計請仍飭該河督等力求撙節以符定制從之○賽尙阿奏查粵西軍務由將帥各執己見賞罰旣不相謀功罪何由得當周天爵人本頓直惟多率意而行毫無區別之處眾心益難傾服辦理更覺

掣肘卽如烏蘭泰所奏獨鼂山南先勝後敗一節查閱周天爵及  
烏蘭泰原奏其所敘情節前後詳略不無舛漏以臣所聞係該匪  
壅流設伏計誘官軍烏蘭泰乘勝前追催令馬善寶等率兵徑渡  
墮賊奸謀以致官兵二百餘人死於鋒刃者十之二死於湍流者  
十之八烏蘭泰目睹輿尸欲以身殉中情痛迫不爲無因然輕進  
失機究與臨陣退縮有間似亦毋庸深究惟威甯鎮七賊撲營千  
人潰敗一節該總兵重綸實係先期患病在象州城調養尙無規  
避情事是日撲營賊匪分股前來實有數百俟佟攀梅慶祿到案  
前後情節不難嚴究務期水落石出以服眾心又向榮所帶湖南  
弁兵初到粵時連獲勝仗向榮所用黑旗逆匪望而退卻以臣訪  
聞向榮每得一勝仗每兵賞銀一兩其時帶兵尙少及李星沅到  
時謂其難以爲繼令減作三錢軍中譁然誓不出力後雖改同一

兩而兵心已渙竟難復振至向繼雄保舉一節聞係同營將弁公呈求李星沅保奏並非向榮之意其後來不聽號令之故不係乎此見在湖南兵丁業經臣札飭挑選已分別病弱者一千餘名撤回歸伍重綸所帶黔兵派赴南太隨勞崇光勦捕顏品蟠大股匪徒六月二十七日新墟之役秦定三李能臣經文岱等均能同心勦力設計用伏使逆匪大受懲創可見各營將弁具有天良並非不願殺賊立功伏思已往情節諮訪既難得實誠恐少有偏聽仍蹈前轍矧當各文武振勵精神馳驅用命之際一予糾察則眾情疑惑人人有自危之心兵機所關誠非淺鮮以臣愚見惟有懇恩自臣到粵之日起所有從前不遵調度各情及漏未參劾之處一概寬其既往若復狡猾推諉坐失事機臣欽遵面奉嚴旨凡歸臣節制之員一面奏聞一面卽於軍前正法以肅軍令又奏中坪賊

臣始意窺伺省城因兩次北撲受創遂翻山南竄惟省城並無多兵僅恃募勇團練近日盤獲奸細知荔浦陽朔一帶均有匪徒勾結又湖南與粵西接壤之區屢有匪徒出沒再四籌思惟臣暫駐省城藉坐鎮之勢消羣逆之萌使大股賊匪不敢北窺桂林宵小之潛伏者亦不敢狡焉思逞且就近與撫臣鄒鳴鶴商辦一切事件似較妥便又奏查逆匪前股分駐新墟安眾莫村盤龍一帶輦政胡以洗蕭潮濱楊秀青在內後股在紫荊山內花雷茶地大坪村等處洪秀泉馮雲山在內其後路雙髻山頂有賊扼要屯聚最後豬仔峽有賊守險並有屯糧山勢斗險該匪於各要口乞斷路徑壘石架木設柵堵守烏蘭泰等兵勇分爲西路東路均在紫荊山前提督向榮等兵勇在紫荊山後烏蘭泰先期知會各路於六月二十七日進兵並知會向榮撥兵赴山放礮以亂山內賊勢是

日烏蘭泰督兵勇千五百餘名由護甲間道涉淺渡河整隊前進  
匪隊退回忽聚忽散林內伏賊亦忽去忽入秦定三兵已由竹園  
村南來漸至第二竹林後烏蘭泰卽令在林後整隊豫備時莫村  
北邊及大莫村東南房屋已爲火箭焚燒另股賊五六百人奔入  
竹林欲鈔我軍兵勇連放槍礮打傷無數其南邊另股已入兩林  
聞秦定三兵由南林後迎出槍礮齊發該匪前隊俱倒後隊飛奔  
其落後者均已刺斃此烏蘭泰進兵大勝之詳細情形也總兵李  
能臣於六月二十七日五更出隊會同王錦繡由白鳩石角一帶  
前進離干村四五里該處有溪河二道兵練涉淺而過將及岸西  
該匪數千蠶擁撲來李能臣飭兵練伏住勿動連施槍礮該匪紛  
紛倒地自己至未斃數百人該匪敗回干村李能臣親督將弁燒  
燬該匪哨樓一座該匪伏竹林放礮滇黔兵兩路夾攻該匪不能

藏伏敗回三里村官軍奮勇直攻該匪分三股迎敵自申至酉該  
匪敗退新墟我兵進攻天已昏黑當卽撤回此李能臣進兵獲勝  
之詳細情形也經文岱亦先接烏蘭泰知照於二十七日會同張  
敬修督帶兵勇出隊至古埽村有古秀河一道不能涉渡逆匪數  
百人對河拒敵兵勇齊放槍礮擊斃多名賊卽退去經文岱等立  
飭兵練砍竹木紮籬二十餘架用作浮橋兵勇如履平地過河離  
新墟四里許見蔗田一帶足可埋伏遂密與張敬修分伏蔗林飭  
弁兵前往新墟誘敵良久賊出二千餘人我兵詐退賊果涉水來  
追我兵且前且卻誘至蔗田伏兵盡起奮力攻擊銳氣百倍自午  
至申斃匪數百人時有辦理雲南糧員署武宣縣陳寶運糧到陣  
按兵散給軍士騰歡此經文岱獲勝之詳細情形也是日向榮亦  
出隊至雙髻腳該處左山右水羊腸險峻一起一伏兵壯連爬山

嶺計十餘里該匪鳴角放礮滾石阻我隘路官兵亦開大礮轟擊  
相持一時許山勢過斗不能攻入二十八日向榮親督兵壯移偏  
山角至屯應村紮營差人上山攀藤附葛直上山顛並派令陳瑞  
芝帶潮勇入山探路連燒賊棚五處砍倒木柵五座直探至豬仔  
峽該處兩山並峙中通一綫十分斗險該匪先將大石塞路我兵  
仰攻人力難施另覓路徑以圖進剿此向榮連日進攻紫荊山後  
路之詳細情形也查此賊自中坪新寨回竄以來盤踞紫荊山內  
花雷等處前以新墟爲門戶後以豬仔峽爲門戶見在前路烏蘭  
泰等雖獲大勝而新墟卽日未能攻破後路向榮雖連次進攻而  
豬仔峽山勢斗隘亦未能奪獲見在達洪阿統帶川兵業已到潯  
不日卽與烏蘭泰會合巴清德亦自象州帶川兵前進計日可與  
同榮會合臣仍隨時嚴飭各路文武將弁相機度勢務期迅速肅

功所有紫荆山前後兩路攻剿會匪均屬奮勉烏蘭泰謀定後戰號令嚴明秦定三奮兵接應斬獲甚多應請賞戴花翎李能臣王錦繡相機會剿屢挫賊鋒經文岱張敬修設計用伏燒燬賊巢尤善用兵向榮應期攻剿督率有方請旨交部從優議敘陳瑞芝連破五寨勇往可嘉請賞戴花翎署武宣縣陳寶以糧食分給兵丁應時之需極爲得濟請旨交部議敘 上諭軍機大臣等賽尙阿奏進剿新墟詳細情形並提督向榮攻擊豬仔峽得獲勝仗另單奏各路剿匪情形披覽均悉紫荆山大股逆匪經官兵四面堵逼勢漸窮蹙自應隨時合力進攻該大臣仍駐桂林扼其由大樟北竄之路所見甚是但恐兵力厚集前後夾攻之際該匪勢窮鋌險拌死突奔凡北面山嶺險隘之地固屬緊要其南路通江各渡口尤宜嚴加堵截勿任竄突南趨至糧鹽爲賊匪要需必當設法斷



其接濟攻剿更易得力此時大兵會合節制嚴明蠢茲小醜定必一鼓殲除餘匪自望風瓦解朕日盼捷音之至也至節降諭旨查覈前此各文武功過據奏見當用人之際姑寬既往儻能和衷集事奮勇圖功所有從前不遵調度及漏未參劾之處即可無庸深究所論亦合機宜均著照所議辦理至單開各路剿辦情形南太一帶兵單賊眾尤關緊要雖經添兵協剿仍須防其奔突蔓延該大臣務當督飭司道鎮將等激勵兵勇互相保衛並隨時知照徐廣緝合力兜捕使著名賊首迅速就擒將此由五百里諭令知之○賽尙阿奏遵查鎮將不和情形並隨時開誠布公寬嚴並用新墟之役各營將弁勦力同心可見具有天良得旨皆汝聲望所致將士用命亦不必過爲謙抑又奏籌布大局擬暫駐紮省城批特以鎮靜斷乎不可焦急○安徽巡撫蔣文慶奏壽州匪犯程六麻

孜與合肥縣捻匪高四八孜結捻肆橫抗官拒捕另有高占貴謝  
正科亦均係積惡匪徒黨援恣擾臣嚴飭文武員弁實力兜拏節  
據該員先後稟獲匪黨段洪等十七名並要犯謝正科高占貴高  
四八孜等三名餘黨四散查高四八孜高占貴謝正科或係匪兇  
或係逃遣皆屬亡命之徒段洪等亦均與程六麻孜等訛搶有案  
見既拏獲自應提省嚴究從重懲辦以昭炯戒仍嚴飭各地方官  
務將程六麻孜等按名弋獲以靖地方上諭務期淨絕根株不  
准稍畱餘孽此次辦理後若仍蹈故轍致被牧令朦混朕惟蔣文  
慶是問○庚戌翰林院呈進侍講學士潘曾瑩撰擬原任兩江總  
督李星沅祭文碑文得旨祭文碑文獎譽過實況辭藻太多著另  
行刪改李星沅調度失宜惟念其沒於王事故爾優卹其功過不  
相掩之處亦應敘明溯其歷任封疆尤不足稱矣○壬子命工部

尙書阿靈阿總管內務府大臣基溥泰甯鎮總兵官德春恭辦

慕陵隧道工程○甲寅諭軍機大臣等陸建瀛奏遵旨查拏捻匪情形等語安徽壽州合肥等處匪犯節據王植蔣文慶嚴行審辦務期淨絕根株茲據該督奏稱程六麻孜見已究出蹤迹著卽嚴飭地方官迅速查拏毋使漏網其邳州與山東連界地方及與銅山縣交界地方均有匪徒滋擾業經陸建瀛飭令徐州鎮總兵督率將弁嚴行接捕仍著該督撫等隨時嚴督地方文武一體緝拏並查明前次帶兵捕匪之千總趙守元有無畏葸情事從嚴參辦至徐州一帶與山東郟城蘭山等處連界該匪徒等此拏彼竄勢所必至著陳慶偕遴派得力員弁於兩省交界處所合力兜捕並查沂州等各屬有無土匪勾結潛藏認真偵緝不可稍分畛域其程六麻孜是否卽喬建德黨與著陸建瀛等查探確實知照河南

查拏究辦毋稍疏縱將此各諭令知之○是月緩奉天新民廳新收地畝額賦賑福建澎湖廳被風災民緩山東曹嘉祥二縣濟甯等二衛雹災新舊額賦免兩浙各場道光二十一年以後竈戶積欠額賦

八月乙卯朔賽尙阿奏逆匪竄踞紫荊山分飭各營相機進剿七月十九日據達洪阿烏蘭泰咨報初十日卯刻進兵豫期知會總兵李能臣副將王錦緒帶兵勇千七八百名由新羅塘等處攻新墟東南總兵經文岱署道張敬修帶兵勇二千餘名由馬嶺等處攻新墟正東署總兵李瑞王夢麟撥兵八百於新墟之東北截擒逃匪達洪阿督兵過思盤渡走安樂塘攻莫村之北新墟之西南烏蘭泰復督總兵秦定三過思盤渡攻新墟西北並堵紫荊山口兼防金田伏賊且戰且進自辰至未斃賊四百餘人賊勢大挫逃

回寨內山內賊巢星羅碁布各處進山隘口均有賊守巴清德向榮先將山內路徑探明將兩營兵勇分路於十五日寅刻進剿先期密派兵勇由間道翻山爬嶺乘夜至豬仔峽雙髻山等處各隘口繞賊上路合擊分派總兵劉長清帶川兵四百名由崇響翻山攻豬仔峽參將巴彥布等分帶漢屯川兵義勇仁勇共千二百餘名攻冷田黃茅嶺署總兵松安等分帶皖楚兵八百名攻豬仔峽中路其餘各要隘分派弁兵潮勇攻擊巴清德統領京營員弁及漢屯兵勇會合向榮直由中路進攻該匪於正面山峽內設伏阻截木石並發槍礮疊施山路險窄我兵致有受傷巴清德催令兵勇分由兩旁進剿不准退縮我兵奮力直攻峽穴賊匪退後進至要口斃賊甚多當將豬仔峽要口奪回其雙髻山賊匪見我兵占據隘口槍礮木石如雨齊發我兵不能直前巴清德傳令俟賊槍

礮放過我兵卽齊心迎擊並派參領福曜施放火箭將賊望樓焚  
燒並轟著火藥一桶賊始驚惶我軍時已繞出賊後上下夾攻匪  
眾逃竄我兵搶上山頂仍飭兵勇窮追該匪熟悉山徑由小路南  
竄我兵追三十餘里斃賊不少該逆死踞新墟者因晚稻將熟計  
圖掠穫入山是鵬化大樟二路必須嚴防已派桂平道許祥光募  
勇堵禦鵬化大樟一路有總兵李伏長瑞帶兵駐紮 上諭軍機  
大臣等本日據賽尙阿由六百里馳奏進攻新墟賊巢並攻破雙  
髻山要隘移營山頂各情形此次進攻新墟達洪阿烏蘭泰等督  
率鎮將分路進兵若非韋允升誤過伏匪被害又值大雨已可直  
搗賊巢殲茲羣醜雖小有挫衄究屬奮勇爭先巴清德向榮等由  
紫荊山後路越嶺前進攻克豬仔峽連破雙髻山險隘要口一日  
之間進占山頂又復窮追深入斬戮多名覽奏曷勝嘉慰此時賊

匪失其負隅之固我兵據險臨高勢若建瓴事機極爲得手惟地處險要賊必拌命爭拒我兵固當乘勝進攻尤當防其鈔襲後路務須步步爲營聲勢聯絡庶期有進無退計出萬全韋允升所帶香山壯勇甚屬得力見交何人管帶正可乘其奮激勉以圖功前據奏豬仔峽爲賊匪屯糧之所今旣攻破該匪勢更窘迫惟見當早稻登場難保不意圖搶掠苟延殘喘自應迅速合剿斷其糧食使賊首進無可掠退無可守我兵奮力殲擒居民亦可乘勢縛獻相度機宜時不可失至鵬化花洲大樟等處山徑紛歧賊匪窮極或思回竄且路通平南一帶我兵見在前後圍攻新墟逆首韋政洪秀泉馮雲山等均在圍中若不嚴防竄路卽使埽穴恐未能全獲渠魁該大臣已先見及此必能加意防堵殲除醜類淨絕根株也朕於昨日賦盼信詩二首今日卽得捷音深慰繫念惟冀該大

臣等迅奏膚功同膺懋賞勉之望之將此由五百里諭令知之

御製盼信詩曰狼奔豕突萬山中負險紫荊

山

必自窮峽

狹

狹界

雙峰抗難破兵分五路銳齊攻壯哉烏

烏南

向

榮謀兼勇嘉爾賚

阿發向鄒鄒鳴

才濟忠權有攸歸師可克威揚邊徼重元戎罹劫吾

民堪浩歎冥頑梗化罪難寬因除巨憝武非黷回思庸臣心可寒

默籲蒼天事機順速望黔庶室家完未能繼志空揮淚七字增慚

敢慰安○以攻勦新墟獲勝欽差大臣大學士賽尙阿得旨獎賚

賞總兵官劉長清花翎都統巴清德提督向榮賞敘有差○丙辰

諭內閣前據潘鐸奏參河南陳州府知府黃慶安被控收受程儀

供應降旨將黃慶安解任交該撫審訊茲據審明定擬具奏並自

請交部議處黃慶安係該撫保舉之員既經訊明有向屬員借貸

情事著卽革職潘鐸未能先事覺祭著交部議處○河南巡撫潘



鐸奏永城等縣雨水過多委員履勘辦理得旨認真查勘勿稍粉飾若再蹈習氣朕必將潘鐸治罪勿謂戒之不豫也○湖廣總督程裔采奏遵旨籌防粵匪得旨嚴密防堵毋稍疏懈又奏查探粵西軍務情形並訪拏會匪批督飭所屬勉爲之楚南會匪潛伏已久俾勿勾引爲患是爲至要若內患已成一朝瓦解不可問矣又奏請以丁憂提督余萬清畱辦湖南防堵事宜允之○丁巳以剿擒匪首劉八賞署廣東廉州府知府沈棟輝花翎予提督陶煜文等優敘○戊午祭大社大稷○癸亥潘鐸緣事降調以李德爲河南巡撫黃宗漢爲甘肅布政使調孫毓淮爲浙江按察使以潘鐸爲山西按察使○甲子諭內閣前因已革江西巡撫陳阡有被參款蹟當交陸建瀛陸應穀秉公確查茲據陸建瀛等分別查明覆奏陳阡古連魁各喚女僎至署演唱陳僑在省寓所亦曾喚

唱一次實屬有玷官箴並先據裕泰覆查陳阡前在侯官縣任內有與賣珠翠民婦同賭之事更屬不自檢束陳阡古連魁陳僞業經革職姑免置議穆齊賢訊無聽過女戲惟係地方武職大員並不照例驅逐亦有應得之咎所有革職之案著准其開復仍交部議處至陳阡奏學政收受規費一節見據查明孫葆元張芾考試各府均係循照舊章辦理並無格外需索情事著毋庸議此案陳阡被參各款朕特命學政查辦乃陳阡奏學政陋規卽在張芾查參之後並因前充提調時與學政孫葆元結有嫌隙一併牽砌具奏名爲因公起見實則有心挾制陳僞又復具稟申訴與陳阡所奏如出一轍難保非受其指使巧爲詆訐似此特交查辦事件被參各員藉端挾制欲使查案大臣先存避謗之心相率爲僞扶同隱飾致朕耳目壅蔽於政體大有關係此風斷不可長至各省學

政經朕特簡爲士子表率亦各宜砥礪廉隅恪守清操雖延請幕友出棚按試費用較繁向資棚規津貼但各省均有舊章豈容踵而加厲嗣後各學政如有不知自愛任意需索者著各督撫隨時查察據實參奏毋稍徇隱○以蔣蔚遠署河南巡撫由布政使署○乙

丑諭軍機大臣等王懿德奏土民呈控番賊擾害請飭查辦並節錄原稟呈覽一摺本年五月以來西甯一帶野番時出搶劫節經薩迎阿奏官兵追捕情形並將遇賊怯懦之都司焦士忠奏參革職先後降旨諭令該署督飭各鎮營實力操防嚴守要隘茲據王懿德奏稱西甯紳士平番耆民等於金縣途次具稟並稱曾在署總督處喊稟多次不爲查辦是否該署督前奏情形尙未詳盡抑或另有別情見在賊番果否斂迹地方文武如何辦理廩生李國棟等業由王懿德遞交甘省著薩迎阿確切訊明妥爲查辦據實

覆奏番匪屢出搶劫事關邊防民瘼必應嚴飭剿捕大加懲創方足以衛民生而肅邊圉諒薩迎阿自能懷遵節次諭旨認真整飭不因暫時署事稍形寬懈亦斷不以琦善因剿辦番案獲咎遂任鎮將等姑息偷安轉貽後患也原摺並呈稟二件均著鈔給閱看將此諭令知之○丙寅諭內閣總管內務府奏援案請將永遠枷示之逃走太監改爲發往黑龍江永遠監禁一招向來逃走太監永遠枷號均在慎刑司羈禁原以該太監等愚頑性成就近枷示以昭懲儆若改發黑龍江監禁恐稽察難周或仍致在配脫逃轉不足以示儆其如何變通之處著總管內務府大臣等再行妥議具奏尋奏近來太監紛紛報逃督不畏法應遵諭就近枷示查番役衙門距慎刑司衙門較近嗣後永遠枷號之太監若積聚較多擬卽在番役衙門分禁枷示責令管轄番役司員等妥爲稽察從

之○諭軍機大臣等陳慶偕奏登州水師戰船被賊占駕海防喫緊擬親往督辦一摺山東登州洋面上年屢遭閩匪劫掠經該省雇募廣艇痛加勦辦盜風稍息茲據奏稱七月二十五日榮城縣石島洋面有盜船十餘隻聯踪抗拒官兵接仗互有殺傷次日副將鄭連登等督兵進擊因眾寡不敵官弁兵勇盡行落水新舊戰船被賊占駕九隻副將關防文卷盡失望見賊船各有夷人數名等語此項盜船究係來自何處何以內有夷人是否閩粵匪徒僞爲夷裝藉以恐嚇或挾上年勦捕之讎併力報復似此猖獗不法實堪髮指必應迅速勦辦除分飭盛京直隸江南於所屬洋面合力堵剿並飭陸建瀛等迅派得力將備酌撥上海戰船水勇赴東協捕外陳慶偕見已將鄉試監臨事宜委令藩司代辦卽日馳赴登郡著督飭新任登州鎮陳世忠登萊青道英桂等調集三營水

帥並飭守備黃富興招募沿海艇勇由該鎮統帶出洋剋日追剿務將盜船悉數拏獲確究來厯窩巢徹底懲辦勿任竄越外洋及向他省洋面勾結滋擾並著查明鄭連登等所稟在洋力戰被礮轟傷落水後遇救登岸等情是否確實如果該副將等見賊畏怯棄船先遁復敢捏詞飾報卽著從嚴參辦另片奏雇船募勇等項需費頗鉅著准其在於司庫廟工生息款內借支銀二萬兩以濟要需事竣籌補還款將此諭令知之○諭據陳慶偕奏登州水師戰船被賊占駕海防喫緊一摺洋盜滋害商船拒傷官弁竟將水師戰船占駕九隻亟應多募艇勇厚集兵力痛加剿洗惟該匪往來洋面四路可通江蘇與山東毗連尤應密飭水師將弁一體嚴防勿稍疏漏又片奏上年上海勇船曾因自衛商艇來東頗資協助之力見在山東洋面剿捕盜匪情形甚爲緊要必須與江南省

合力勦辦方不至有誤事機著陸建瀛等遵委水師幹練將備數員飭令上海商局挑選勇船十餘隻水勇四五百名多帶槍礮器械星速駛往東洋幫同勦辦以壯聲威想該督等接到山東咨照已籌畫及此也原摺片均著鈔給閱看將此諭令知之○諭陳慶偕奏登州水師戰船被賊占駕海防喫緊一摺洋盜肆擾急宜嚴防盛京直隸各海口與山東洋面毗連東省旣嚴加勦捕勢必至分竄各口著奕興訥爾經額遴委幹員帶領弁兵各於該省海口要隘處所嚴密防堵如有匪徒竄入該二省洋面卽著分投截擊杜其逃竄之路庶東洋勦捕更易得力原摺著鈔給閱看將此各諭令知之○丁卯諭內閣戶部奏請飭查福建鹽務辦運情形等語閩鹽東西兩路倒退篷額前經劉韻珂奏請改爲委員官運甫屆兩年何以復請將東路官領運本統交販戶領運辦理殊屬兩

歧著新任總督季芝昌巡撫王懿德確查見辦官運有無把握是  
否須仍改歸商運如將民捐運本交販戶承領試辦有無流弊查  
明據實覆奏並將該省嵯務如何整飭通變可資經久之處悉心  
妥籌奏明辦理尋奏遵查官運幫銷日絀勢難加辦又無殷實商  
人可以招舉惟有力節虛糜務歸寔在並將代銷名目永遠革除  
報聞○諭前據駱秉章奏湖北漢陽府屬士民程瑞凱等呈請捐  
資助餉代已革發遣新疆之前任湖南長寶道楊炳堃贖罪當降  
旨交程喬采訪察具奏茲據查明該士民等同心愛戴係屬實情  
惟該革員前次獲咎情節較重且此端一開將來獲罪人員恐不  
免有援例飾詞希圖邀恩情事所有該士民等呈請代楊炳堃贖  
罪之處著不准行○諭軍機大臣等前因有人奏河南捻匪劫掠  
肆行節經寄諭潘鐸飭令嚴行究辦茲據奏稱查明泌陽縣角子



山附近村莊並無匪徒盤踞形迹亦無一日搶掠數十家及唐縣匪徒欲行圍城情事見獲喬建德夥黨止供有訛索錢文各案此係實在情形斷不至釀成事端等語外省州縣於盜劫重案往往心存諱飾化大爲小未可受其蒙蔽李億到任尙需時日蔣蔚遠見署巡撫責無旁貸著將潘鐸所奏各情節確加查訪各府屬有無捻匪出沒嚴密緝拏並飭偵捕喬建德務獲懲辦不准稍涉鬆懈尤不准代人受過曲爲回護以靖地方而懲積習將此諭令知之○戊辰禮部尙書惠豐卒贈太子太保予祭葬諡恪慎○以奕湘爲禮部尙書由成都將軍遷○己巳諭內閣徐廣縉奏參總兵知府一摺廣西左江鎮總兵德亮太平府知府吳德徵於廣東省匪黨李士青李士明等被剿竄入太平土州之時並不實力剿捕轉飾稱難民不分良莠概行稟請送回欽州原籍辦理實屬乖謬德亮吳

德徵均著交部嚴加議處○諭軍機大臣等據徐廣縉奏參總兵知府畏賊不勦飾稱難民咨送回籍一摺賊匪李士青李士明係李士倡餘匪夥同顏品瑤等在南太兩府土州等處滋擾年餘竄回廣東經該處兵勇痛勦復逃廣西積至四千餘人該總兵知府何以不分兵堵捕轉給路票咨回欽州本籍又於何時將李士青等招撫曾否稟明該大臣嚴辦德亮等因李士青等人數眾多該處兵力不足會稟總督暫爲從權辦理是否飾詞推卸抑係兵力本屬單弱爲此將就目前之計見在廣西重兵自以圍攻新墟殲滅大股爲要是否尙能分兵南太一帶協勦勞崇光見駐該處所帶兵勇是否足資調遣著該大臣飭令該司悉心體察隨時稟明酌辦毋誤事機徐廣縉見在督辦羅定州凌十八一股巨匪已飭陶煜文等督帶潮州兵勇於欽州扼其要隘亦未知能否越境會

勘是太平一帶兵力空虛亦屬可慮想該大臣已與徐廣縉通盤籌畫計出萬全也本日據奏軍需支發銀數一摺頗爲明晰其潯州府城添設糧臺見委左江道楊彤如管理徐廣縉又奏委楊彤如馳往梧州遏賊旁竄之路此時究竟何處情形最要著與徐廣縉鄒鳴鶴酌量辦理又前據程喬采奏湖南武岡營擊獲奸匪陳先得一名據供曾在廣西融縣充當鄉勇被賊擄捉服役六月初一日有大頭目禹老八等派出二十人飭往各處查探等語禹老八係何處會匪何股頭目果否有派出多人各處查探之事著嚴密查拏勿令越境勾結至金田新墟逆匪前已四面堵截奪其後路要隘賊勢已形窮蹙行軍制勝惟在相其緩急不失事機或重圍進逼聚而殲旃或設伏誘擒出其不意總須謀定後動正不必急於見功此股會匪一經殄滅卽移兵南太一帶勢如破竹朕盼

望情殷惟冀該大臣蕩寇安民至軍行一切遲速機宜亦不爲遙制也左江鎮總兵德亮太平府知府吳德徵見交部議均著仍令在軍營效力自贖德亮本係交該大臣察看之員此次辦理乖謬是否畏葸推諉仍著確查具奏將此由五百里諭知賽尙阿並諭令鄒鳴鶴知之○諭寄諭兩廣總督徐廣縉此次德亮吳德徵於地方著名賊目停畱太平土州等處並不實力勦辦反行飾詞咨送回籍實出情理之外其所稱兵力不足之處是否飾詞推卸抑係太平一帶兵力本屬單弱仍宜酌撥弁兵協勦見在勞崇光已抵該處著該督飭令該司察看南太等郡賊勢應如何添兵分勦並知會賽尙阿應酌派何處將弁兵丁前往會辦務須通盤籌畫不可稍分畛域該督揜逆匪劉八之後見在籌勦凌十八一股若能速獲渠魁即可移兵廉州督同陶煜文等與廣西太平等處

文武會合以全力兜捕庶可漸就肅清該督統轄兩省當與賽尙  
阿隨時咨商計出萬全慎勿顧此失彼致誤事機至前奏僭州土  
匪滋事被害之巡檢胡晨署守備鄭宗霖把總張遇春外委林鳴  
鸛等著查明奏請議卹又署廉州府知府沈棣輝昨因擒獲劉八  
賞戴花翎該員於道光二十九年剿辦陽山等縣匪徒案內業已  
得有翎枝此次軍功應如何加獎之處著該督另擬具奏將此由  
五百里諭令知之○庚午賽尙阿奏副都統達洪阿名望素著向  
深知其忠勇乃此次帶兵進剿新墟每遇接戰不待兵勇整束齊  
備先已乘馬獨出實能不避鋒鏑而於隊伍步伐毫無計畫以致  
所帶京川各營弁兵多有傷挫若非烏蘭泰秦定三處處援應則  
屢瀕於危且性太剛褊於弁兵時加怒詈賞罰無紀號令不明軍  
心渙散若不及早調度難免兵潰之虞臣夙夜籌思欲行參奏則

其人並非退怯欲行撤回則其勢必至決裂適接達洪阿來函見  
因患病請派大員接帶官兵以便隨營調理臣因令其赴潯州府  
城調理將所帶弁兵移交烏蘭泰營帶於軍事大有裨益又慮其  
痊愈後復欲帶兵臣禁止無名用之不可儻蒙召令回京當差既  
可全其身名又可整肅軍伍 上諭內閣達洪阿自到廣西軍營  
以來奮勇勦賊不辭勞瘁以致舊疾復發朕心實深眷念著毋庸  
仍畱軍營卽來京安心調理病痊照舊在京供職○諭軍機大臣  
等賽尙阿奏進勦新墟見在前後兩路諸營逼近賊巢一摺並單  
開各路堵截零匪情形及接獲逆書僞示各件逆匪盤踞新墟經  
該大臣督飭統兵將官分路進勦雖未得手亦各有斬擒且以官  
兵紮營離賊寨較遠恐臨期有誤約會飭令前後兩路諸營先後  
移紮逼近賊巢以期聲勢連絡布置均合機宜此次巴清德向榮

進剿冷田村焚燒賊糧四百餘石該匪糧食漸少難保不鋌而走  
險別圖搶掠且據探訪逆首覃政等冀圖竄越鵬化該處七十餘  
村屯積頗多且與胡以洗等花州舊巢毗連見值秋稻成熟之時  
更當分飭各該處弁兵嚴密堵禦斷其接濟並曉諭村民自相保  
衛毋令積穀之所轉齎盜糧見在軍營逼近賊巢糧臺尤關緊要  
務須督率防護弁兵慎密守禦萬勿稍存大意該匪雖於附近多  
增木寨復於稻田設荆棘等物難保不外示拒守陰思他竄其後  
路鵬化一帶業經派兵防堵其西南羅淥崗若設計誘令賊匪竄  
入以懈其死守之心攻剿更易得力偽軍師楊秀青徧貼偽示編  
造妖言倡脅愚民實堪痛恨必須將著名各逆首設法殲擒勿令  
漏網以快人心該匪等被圍窘急正似困獸猶鬬之時若冒險輕  
進稍有挫衄賊醜恐致復張總宜計出萬全算操必勝昨已諄諭

及此諒該大臣操縱緩急自有權衡也至單開各股零匪並無德亮等稟報李士青等股咨回欽州一節著仍照前旨確實查辦所有傷亡官兵文瑞等著查明請卹署遊擊袁貴殺賊深入不知下落一併查明具奏將此由五百里諭令知之○前任禮部尚書龔守正卒贈太子太保予祭葬謚文恭○辛未盛京將軍奕興等奏福陵隆恩殿工程完竣請飭欽天監諏吉由東配殿恭請神碑還御得旨該衙門敬謹辦理○甲戌諭內閣前經特召前任太常寺卿唐鑑來京疊次召對嘉其品學兼優器識安定欲令畱京供職念該員年逾七旬力陳衰老若使勉強服官轉非所以示體恤唐鑑著加恩賞給二品銜仍畱江南主講書院江南爲人文淵藪得老成碩學爲之教導俾後進有所矜式於士習民風當有裨益也○乙亥諭軍機大臣等奕山布彥泰奏會議俄羅斯



通商事竣擬定章程並開單呈覽一摺此次俄羅斯使臣來赴伊犁會議通商事宜該將軍參贊公同酌定條款內如卡外搶案中  
國不管及在內地竊案分別酌辦等情所議均屬周而並將喀什噶爾不准通商一層據理折辯該使臣無可置對給予文憑以爲  
回國銷差之據辦理尙屬妥協見在該使臣已回本國所有伊犁塔爾巴哈台二處貿易是否卽自明春試辦每年清明後入卡冬  
至節停止其辦理通商安靜情形如何分別奏咨存案並內地商民如何稽查約束一切未盡事宜仍著該將軍等悉心妥議具奏  
單內第二條商人與夷商交易彼此設官照管係由營務處派員前往各自秉公辦理經此次議定後常時貿易全賴派出之員彈  
壓撫綏照管一切遇有爭鬭小事公同剖斷不至因小釀大邊防  
所繫最爲緊要必須遴委廉直公正之員通曉事體而不貪小利

者方能經理得宜彼此歷久相安該將軍參贊及塔爾巴哈台大臣遇派委時切宜加意慎重及如何酌定年限輪替之處詳晰議奏將此諭令知之○丁丑 上奉 皇貴太妃幸延壽堂○己卯賽尙阿奏據烏蘭泰等稟稱自移營三合水巴清德等約合二十八日前後同進烏蘭泰由下窩過河見小村內有賊搖旗卽回過河北派署副將清長帶黔兵過河面西排列商令秦定三率參將巴圖帶廣東兵四百過河面南排列河內有沙岡一道派楚黔兵埋伏接應分布已畢四面賊匪蠶擁千餘離黔兵不及半里見我隊伍齊整持槍不發退避南邊林後遙見西面林內亦有伏賊西南兩林高坡突出賊匪約五六百名直撲湖北隊香山勇暨湖北兵均開礮轟擊斃賊七八十名該匪退回忽南林繞過五六百賊湖北貴州兩隊勢難支持張敬修王錦繡陸續趕到斃賊二三十

名該匪始退我兵復追過河匪竄已遠收兵回營二十七日張敬修在赤土村與賊接仗斃賊數十名生擒數名又據巴清德向榮稟稱督兵深入紫荆山查看風門坳兩峯並峙該匪將坳口壘石安礮山下小路已斷兩邊山梁搭望樓及草棚數百間踞守與各鎮籌商非三路齊進搶上山梁不能拔此險隘遂派潮勇爲頭隊四川湖北官兵爲二隊由中路進攻武生劉孟三等提勇爲頭隊湖南官兵爲二隊由東邊爬上山梁鈔賊之左陶昌培楊瑞乾爲頭隊廣西官兵爲二隊由西路上山鈔賊之右一面飛致烏蘭泰前路密飭官兵揚旗放礮以分賊勢初二日均銜枚疾走行至山腳一齊殺進槍礮愈緊該匪棄隘敗走立將風門坳隘口奪占該匪滾崖死者不計其數追至古調村外該匪抵死踞守當令兵勇拋擲火彈將村房焚燬該匪從村後逃走復將賊占各村全行燒

燬已離新墟不遠寅刻巴清德向榮親督官兵拔營進至平山正  
在度地紮營探兵飛報賊匪千餘藏古林社內當卽分撥官兵迎  
戰長瑞劉長清親率川楚官兵由山梁橫衝殺入槍礮火箭斃賊  
數十人該匪卽由村後逃竄時烏蘭泰亦令開隆阿李能臣張敬  
修用大礮對新墟轟擊將傾巢之賊全數轟斃約五六百名見在  
新墟前路自大黃江口及附近各營並鵬化要隘均經檄飭烏蘭  
泰處處嚴防以杜竄逸烏蘭泰營內兵力稍單新到之四川屯兵  
八百湖北兵五百經臣飭赴烏蘭泰營尙未能趕到達洪阿回潯  
養病所帶官兵臣卽札飭總歸烏蘭泰調度 上諭軍機大臣等  
賽尙阿奏新墟前路進剿情形並後路攻破風門坳屢戰屢勝一  
摺覽奏實深欣慰逆匪自雙髻山受創之後經官兵疊次進剿該  
匪節節抗拒實屬頑很異常此次前後兩路進攻賊巢屢戰屢勝

斬獲甚多並經巴清德向榮由後路乘勝前進將風門坳一鼓奪  
獲見在我兵逼近賊巢其前路要隘處所經該大臣分飭烏蘭泰  
處處嚴防並將新到之四川湖北各兵及達洪阿所帶官兵總歸  
烏蘭泰調度兵力既厚防剿更易得手惟賊勢窮蹙已極困獸猶  
鬬難保不鋌而走險以圖竄逸且該匪狡黠異常或佯敗詐降疊  
施奸計亦不可稍涉大意賊首聿政洪秀泉楊秀青馮雲山胡以  
洸等此時均在新墟各村圍困之中一經大軍攻破必須按名擒  
獲或臨陣殲斃亦須確切認明毋令免脫該處村民如有設法縛  
獻賊渠者不惟免其從賊之罪並可格外給予恩施想該大臣已  
籌及此矣又片奏南太一路勞崇光前帶兵壯一千六百名復派  
重綸帶黔兵一千名前往又募儂沙等勇三千名並將在省城聽  
調之湖北兵五百名派往協剿惟據疊次單開各股賊匪顏品瑤

雷志賢等往來竄擾我兵仍形單弱見在新墟大兵正在圍偏喫緊之際勢難分派而省城重地防範亦關緊要著該大臣酌量情形如新墟刻已攻破埽穴擒渠卽移兵南下勢如破竹儻一時重兵未能移撥而左江一帶兵力尙不敷用或於鄰近雲貴湖南等省再酌調一二千名以資防剿卽一面飛調一面奏聞毋稍游移至軍餉實數足敷幾月之用亦著豫爲籌駁奏明協撥勿致臨時周章總期盡殲醜類拯我窮黎朕日盼捷音之續至也再勞崇光能否得力據實具奏將此由六百里諭令知之○以攻剿雙髻山豬仔峽賊匪出力賞副將和春等巴圖魯名號餘升敘有差○以攻破風門坳賊巢欽差大臣大學士賽尙阿都統巴清德副都統烏蘭泰提督向榮下部優敘○予廣西陣亡遊擊袁貴等祭葬世職○壬午諭軍機大臣等有人奏革員陳阡自罷官以後干預公

事自稱前任巡撫屬令首府寫信通省屬員湊集盤費非得銀二萬兩不肯出省已革知縣陳儁被參後稟訴已革道慶雲被參後呈控各案皆係陳阡指使陳儁前調吉安府首縣卽係陳阡所保其署泰和縣收漕之時轎前排列大礮百姓畏懼不令進城各情如果屬實必當嚴究懲辦著王植於審辦南豐一案後將該革員等見在被參各款嚴究按律定擬具奏毋得稍有徇隱原片著鈔給閱看至慶雲被參後稟訴一案前有旨交陸應穀查辦卽著該侍郎等一併查訊明確嚴行究辦將此諭令知之○癸未諭內閣程喬采奏湖南吏治廢弛皆因大員未能表率致各州縣相率因循前任布政使見任大理寺卿萬貢珍在任七年馭下過於寬縱因而屬員膽大妄爲丁役營私舞弊門丁書吏因緣爲奸弊端百出吏治所由日壞見在告病之辰永沅靖道呂恩湛由捐納知府

在省數十年專事逢迎廣爲結納辰沅道任內所管屯糧經費虧欠甚多交代難於結報似此顛預辦事貽誤地方若不嚴行懲創何以除積習而儆將來萬貢珍呂恩湛均著先行交部嚴加議處卽著程喬采查明該二員任內劣蹟並呂恩湛虧欠屯糧曾否交代清楚據實具奏毋稍徇隱至見經查出各州縣門丁書吏因緣舞弊各案亦卽逐款嚴行究辦以挽頽風○諭軍機大臣等前據王植奏壽州匪犯程六麻孜等結捻橫行拒捕脫逃當經降旨交陸建瀛蔣文慶及早籌辦旋據該撫覆稱拏獲捻匪高四八孜等多名程六麻孜尙未弋獲茲有人奏該匪日久在逃更有匪徒魏水烟頭張大礮楊思華結黨強劫豎旗有魏大元帥張大將軍字樣擾害善良搶奪解犯姦污婦女又有綽號貓耳躲鷹及太歲金剛閻王老虎者不一而足俱有擡礮鳥槍刀矛器械乘轎放礮嚇



詐橫行若不迅速撲滅必致滋蔓難圖著陸建瀛蔣文慶按照摺  
內所指各情選派幹員上緊查拏務期盡絕根株毋任漏網程六  
麻孜見在逃往何處尤應通飭各屬跟蹤密捕至安徽廬鳳穎三  
府與江蘇之徐邳山東之兗沂曹等府州接壤誠恐此拏彼竄日  
久勾結貽患非輕著江蘇安徽山東各督撫飭屬各於交界處所  
不分畛域合力堵截並知會河南一體嚴拏毋稍疏縱原摺著鈔  
給閱看將此各諭令知之○諭鄒鳴鶴奏密陳粵西積弊已深擬  
次第籌辦一摺據稱到任後檢閱積案至五百八十餘起之多未  
完交代亦積至二百數十起餘如驛站稽遲緝捕廢弛種種弊習  
相沿幾難挽救廣西民貧地瘠官斯土者率諉於邊荒僻遠困苦  
異常因而相率苟安不思振作然總由歷任大吏因循粉飾不能  
實力整頓以致積弊日深若不力挽頽風何以飭官方而蘇民困

著卽照該撫所請次第籌辦先將積案擇要清釐萬勿再任積壓尤須身先率作以整飭廉隅爲本劾去貪濁興起循良庶吾民瘡痍彫敝之餘得所倚賴而政貴有恆事期覈實勿徒空言美觀或至始勤終怠矢之以慎持之以恆朕實有厚望焉將此諭令知之○是月緩河南臨漳等三縣雹災新舊額賦免山西太原岢嵐等二十八廳州縣民欠銀米並給長治等二縣水災修屋埋葬銀加賞江淮各幫丁因災減歇月糧銀米免廣西臨桂全等十二州縣暨興隆等土司所屬舊欠額賦免山東德州等八十九州縣暨德州等四衛民欠銀米

閏八月甲申朔陸建瀛奏請嚴禁天主教允之○乙酉免四川出征兵丁未完行裝銀○丙戌頒王大臣內廷翰林各省督撫石刻御製御門聽政述志示在廷諸臣詩各一分○丁亥諭內閣楊

以增奏豐北廳隄身坐蟄見在趕辦情形一摺據稱本年黃河水勢自白露節後逐日加長八月二十日寅時風雨交作河水高過隄頂豐下汛三堡迤上無工處所先已漫水旋致隄身坐蟄刷寬至四五十丈見經該河督馳抵該處先飭查明被水村莊妥爲撫恤並查照嘉慶元年豐北六堡漫水成案辦理著陸建瀛楊以增嚴督廳汛各員將見在漫口趕緊盤裹應辦各工迅卽興築儻搶護遲延致漫口刷寬愈甚回空漕船或有貽誤惟該河督等是問並著查明此蟄隄是否實係無工處所毋得掩飾該管文武各員著卽嚴行參奏○諭前因御史張廷瑞奏請酌改新疆換防兵丁並侍郎恆春奏請一體改爲眷兵各摺均交伊犁將軍會同陝甘總督等妥議具奏茲據奕山薩迎阿等通盤籌畫臚列各條具奏所稱車輛之糜費浩繁鹽菜之有增無減以及添置鍋帳房屋

展寬各城添設官員耗費糧食已屬諸多窒礙且回疆各城向無內地婦女如改防兵爲眷兵紛紛遷駐更易滋生事端計各城遷改眷兵費用先須籌畫墊銀二百四五十萬兩迨三十餘年後每年始能節省銀六萬兩是所省尙在異日而所費已在目前自無須輕議更張轉滋流弊所有該處換防兵丁均著仍照舊章辦理並著該將軍等行知各城大臣認真操練如有庸懦將弁及老弱兵丁務須隨時甄別裁汰以重邊防將此諭知奕山薩迎阿並諭布彥泰毓書德齡知之○戊子賽尙阿奏據烏蘭泰稟報初九日帶同侍衛開隆阿總兵秦定三行近孔村督兵接探莫村以南俱有礮臺北面三家隴大墩嶺千村一帶均有伏賊古城一帶有不寨礮臺望樓商令總兵劉長清秦定三督兵徐進向莫村放礮該匪並不回敵遂將大竹園一帶燒燬並燒千村賊奔新墟我兵追

至墟口初十日烏蘭泰同開隆阿等帶兵到步安礮一帶匪終不出我兵焚燒三家隴木寨突出百餘賊我兵迎敵該匪復退十一日有匪數十過河劉長清帶兵往捕賊卽逃回十三日該匪六七百人突至孔村烏蘭泰帶兵往剿該匪飛奔回巢我兵追至千村放礮轟擊該匪不敢復出孔村練長連報賊七八百由護甲過河南竄烏蘭泰因約巴清德向榮於十四日同時進攻一面分布隊伍一面挖溝築壘該匪一股由新墟撲來一股由莫村撲來當令胡倖伸趙榮升劉長清等分路進攻埋伏烏蘭泰與開隆阿各帶兵接應秦定三在北面督兵該匪大股分而爲二一撲湖北隊一由竹林繞撲離半里許卽開槍礮我兵俟其漸近開放小礮轟倒十餘賊該匪抵死喊撲我兵用槍礮同擊該匪且戰且退約百餘步復開槍礮竹林後一股已被慶福伏兵用連環槍擊倒無數我

兵追出竹林該匪亦於林後畱賊接應烏蘭泰見正南喫緊畱開隆阿照料西邊調嚴承恩赴南面接應莫村大股一半撲正南一半藏大茶亭後其南撲之賊見我兵開槍卽轉西去兩股合撲我兵槍熱藥盡飛將田學韜隊調來匪不能支復退百餘步站住東南槍聲又緊開隆阿飛赴接應見莫村之賊復分兩股一破慶福之兵擊退一衝劉永鈞之隊我兵橫擊該匪又撲廣東兵隊開隆阿親放鳥槍擊斃二賊該匪始退入坡下溝內伏身轟打我兵稍退誘之使出其時李能臣張敬修兵勇趕到該匪仍奔溝內我兵下坡追殺該匪及林後各賊聚成一處約四千餘人且住且退北面干村又來一股約五六百天已陰沈卽令兵勇往北迎擊以便就近撤回不料該匪盡數追來前軍回走已遠烏蘭泰憤極下馬示拚死戰我兵奮勇回軍斃匪無數匪始敗回我兵追至後嶺是

日轉戰四時之久前後擊斃賊匪三四百名此烏蘭泰一路自初九日至十四日接仗獲勝情形也又據巴清德向榮稟稱各路官兵於初九日圍攻新墟先於初八日派兵勇十餘偃旗息鼓而至拋擲火具匪見火起擁出千餘開礮抗拒巴清德向榮派兵接應賊占樹林我兵四面鈔出殺死多名賊始遁回新墟初九日出隊分兵兩翼沿河而進武生王發魁等各帶勇助勢官兵甫抵古林社外該匪傾巢而至約三千餘人分隊迎出新墟數里開礮副將奚應龍等開放槍礮逼近轟擊點放火箭射中賊匪望樓登時然燒天津鎮長瑞綏靖鎮李伏督兵焚燒賊村擊死執旗賊目一名斃匪數十名仁勇陶昌培等正在過河助剿風雨驟至徐徐撤退該匪冒雨趕來短兵接鬪因雨滑匪亦未敢戀追初十日探報賊數千傾巢而出直撲大營卽飭鎮靜以待瞥見左山脊有騎馬賊

五人黃旗十餘桿賊分踞山梁開礮轟來右山梁一股約二三百人搖旗助勢巴清德向榮卽令提勇上山截其去路又派兵勇由後營上山助威各股賊匪攻湖南營盤當卽派陳瑞芝等帶兵勇分擊迎敵短兵相接斬首三十餘顆直追至古林社始行撤回十三日巴清德出隊至古林社該匪數千早伏新墟外之攔牆內卽督兵直前攻剿該匪倒地不少相持四時之久匪終不出傍晚收兵此巴清德向榮一路自初八日至十四日獲勝情形也查賊自竄出紫荊山後勢已窮蹙但新墟地勢竹木茂密溝塍極多該匪復密設木壘礮臺築牆固守一時未能攻入訊據獲賊供稱見在拆取房屋竹木紮造箠筏翼由石觜渡江南竄因令南路水勇撥船防堵並派委員陳瀚在石觜一帶巡邏此股賊匪若南竄過江不惟桂平等處大遭蹂躪且搶掠裹脅勢必復煽其東北鵬化一



路爲賊舊巢前已令署總兵李瑞王夢麟帶兵勇在古城坳埋伏經文岱帶兵在鄧塘水埋伏復經烏蘭泰撥兵勇接應其鵬化里內七十餘村已飭居民將積穀搬移臣親晤該處紳士面加激勸咸知鼓舞山內搖勇亦志切同仇即使新墟驟難攻破該匪糧盡思逃石觜大黃江處處埋伏斷難飛越而鵬化一路業經密爲布置我兵前伏後追較之困圍死鬪尤易爲力查烏蘭泰嚴密聯絡設防鵬化等處又復晝夜進攻新墟辛苦已極請賞換頭品頂帶二等侍衛開隆阿親冒矢石亦屬壯往請賞給頭等侍衛先換頂帶出力員弁兵勇俟查明再行保奏上諭軍機大臣等賽尙阿奏連日進攻賊匪疊獲勝仗一摺此次雖連日獲勝究未大加懲創見據訊供該匪有由石觜渡江南竄之信自應分派兵勇嚴密堵禦惟該匪詭譎異常難保不爲聲東擊西之計其東北鵬化一

路經該大臣激勵該處紳士卽山內徭勇均已志切同仇並經烏  
蘭泰派撥兵勇前往接應布置已極周密儻該匪窮蹙竄出必能  
會合兜撿又據片奏探得新墟賊匪紛紛爬越後路高嶺逃竄見  
經兵勇衝殺圍攻等語該匪股數眾多恐其分作數路牽制我師  
尤當防其詭計見在賊首韋政楊秀青馮雲山等均在圍中必須  
設法誘擒勿令竄逸更致勾結至該匪在墟外加築土牆並於地  
上盤旋難保不別蓄詐謀不可不妨砍斃黃鬚賊目究係何人著  
卽確查具奏提督重綸忽得痰疾著該大臣察看如未能速愈或  
愈後尙能回任卽奏請開缺另行簡放重綸所帶之兵雖已交惠  
慶管帶而貴州提督亦甚緊要未可耽延至兵貴神速當此乘勝  
之時正可一鼓作氣掃蕩賊氛固不可急遽貪功亦不可遷延誤  
事想該大臣必能洞悉機宜上孚朕意也勉之望之將此由六百

里諭令知之○諭程喬采奏粵東股匪竄撲宜章縣境一摺粵東餘匪僅數百人何以一入楚境遂致搶卡戕官可見該省疊次奏稱嚴密防範盡屬虛詞見在該匪竄聚乳源交界之客家洞地方業經該鎮道選帶兵勇前往著該督等嚴飭堵剿仍咨會廣東文武一體剿捕斷不可互相推諉致令蔓延生擒賊婦王蕭氏等著嚴行審訊按律懲辦所供沙包會收徒一百餘人是否有湖南會匪暗相勾結其同夥之廣東匪徒楊得魁劉上元等如訊有窩聚地方卽飛咨廣東督撫查拏務期全數弋獲至被賊衝散不知下落之守備趙鴻賓著隨時查明奏聞將此由五百里諭令知之○諭程喬采奏廣東陽山縣匪徒數百人竄撲宜章之思仁坳卡守備趙鴻賓等受傷署千總張淩雲把總杜瑞被害該匪屯聚莽山熾粃嶺一帶續經宜章縣營帶兵往剿轟斃賊匪十餘名生擒頭

目賊婦王蕭氏餘匪又竄聚乳源交界之容家洞地方見已飛飭  
永州鎮總兵孫應照衡永郴桂道張其仁馳往勦辦並咨廣東會  
勦等語湖南宜章縣界連廣東連州陽山乳源等處匪徒竄入滋  
擾戕害弁兵負嵎屯聚亟宜痛加勦洗著徐廣縉葉名琛卽飭將  
弁帶兵馳赴該處合力兜捕堵數殲除勿畱餘孽至王蕭氏一犯  
訊供起會收徒與廣東之楊得魁劉上元等同夥著該督等遴派  
委員將該犯等嚴密訪拏務獲懲辦其沙包會係何邪教王蕭氏  
所收之徒一百四十人見在何處遊奕此外入會之人尙有若干  
均著嚴查究辦毋得稍有不實不盡原摺著鈔給閱看將此由五  
百里諭令知之○以攻勦新墟獲勝賞烏蘭泰都統銜二等侍衛  
開隆阿頭等侍衛○予廣西殉節巡檢馮元吉祭葬世職建祠予  
卹溥附祀○庚寅諭內閣徐廣縉等奏勦辦凌十八股匪情形一

摺賊匪凌十八自移竄廣東羅定州羅境地方經該督帶兵籌剿  
茲據奏各隊兵勇均至分界紮營三路進攻先經小捷繼獲大勝  
護參將衛佐邦管帶兵勇見已趕至羅定正可奮勇攻剿一鼓成  
擒將首匪凌十八並夥黨悉數殲除勿令乘間免脫其何名科等  
股並著該督分飭鎮將速行剿捕將高廉一帶各匪埽除後即可  
移兵與廣西會剿共奏膚功也所有陣亡之黃岡左營把總蕭振  
聲提標外委駱雄超並陣亡兵勇著查明一併咨部議卹○諭前  
據琦善保奏剿辦番回出力各員曾經降旨交薩迎阿查覈茲據  
覆稱琦善前次攻剿番回伊未曾目覩所保人數較多不能查出  
何員出力措詞已屬含混又稱容俟畱心考察另請鼓勵是於剿  
辦番案之外復開冒濫保舉之端尤屬錯謬薩迎阿著傳旨申飭  
○諭御史吳若準奏請嚴禁差役積弊一摺各省州縣設有胥役

原爲辦公差遣之用而蠹役卽因之舞弊假公濟私大爲民害如該御史所稱假催科爲名擾及保甲復假辦差爲名科斂錢文至緝捕不力案盜分贓及遇地方失事誣扳良民任意需索似此種種積弊若不嚴行申禁何以靖閭閻而肅吏治著各直省督撫嚴飭地方官隨時查察儻有前項各弊立即嚴行懲辦如州縣袒庇故縱著卽從嚴參處至直隸河南等省白役一州一縣何至盈千累百之多若如所奏其擾害地方不問可知並著該督撫嚴查禁革毋稍徇隱○甲午諭內閣楊以增奏馳抵豐北三堡勘得口門續經塌寬至一百八十五丈水深三四丈不等見在大溜全行掣動迤下正河業已斷流被淹地方居民罹此凶災流離失所朕心實深憫惻著該督撫等迅速籌款派員妥爲撫恤毋令一夫失所河湮見已分作兩股所擬啟放各壩並勘估各工均著趕緊籌辦

仍嚴飭道將等將東西盤裹壩頭竭力保護儻再有疏虞或致貽誤漕船回空該河督等自問當得何罪耶所有專管廳汛疏防失事之豐北廳通判王熙善豐北營守備郝瀛東著卽行革職枷號河干示眾豐縣主簿鍾乃澄豐下汛把總李廣愛協防朱保珍著一併革職兼轄之徐州道沈濂河營參將呂邦治淮徐遊擊闕興邦均著革職暫行畱任責令隨同辦公不准置身事外楊以增身任河督未能先事豫防實難辭咎著摘去頂帶與兼管河務之兩江總督陸建瀛交部分別議處另片奏沛縣被災較重先行捐銀拯濟並啟放外南之順清河使湖水刷滌河身等語均著照所擬妥速辦理○諭都察院奏各省奏交案件逾限未結請照咨案一律知照該衙門以憑催參等語據查自道光二十一年至二十九年奉 特旨交辦之案尙有福建省十一件廣東省五件奉天省

二件山東省一件江南省一件直隸省一件均屬有逾例限似此因循成習勢必拖累無辜於民生大有關係著各該督撫等查明逾限各案迅速審辦完結毋得再有宕延所有承審遲延各職名並著咨部照例議處嗣後奏交案件著與咨交各案一併將已結未結起數咨報都察院查覈例限催參以清案牘而儆廢弛其步軍統領衙門逾限奏案亦著歸入都察院催參案內辦理○諭御史吳廷溥奏查辦考試出結未能覈實摺片各一件並鈔錄科場例案呈覽著禮部與見議卓秉恬等並王慶雲原奏一併秉公查覈妥議具奏此案見交部議尙未覆奏該御史係直隸籍貫自應靜候部議如所議有未允協原可據實指陳乃於部議未定之先率行陳奏殊屬非是吳廷溥著傳旨申飭○諭軍機大臣等楊以增奏勘明豐北漫口情形並繪圖貼說呈覽此次豐北三堡黃流



漫溢口門已塌寬一百八十餘丈大溜全行掣動民田廬舍多被  
淹沒所謂保障斯民者安在耶見在辦理堵築需用浩繁國家經  
費有常豈能任貽誤各員殃民糜帑應如何分別罰賠及設法籌  
款之處該署督等迅速悉心籌畫妥議具奏務當激發天良撙節  
覈計毋得稍有浮糜重干咎戾將此諭令知之○江南河道總督  
楊以增奏豐北被災籌辦撫恤事宜得旨流離失所皆朕之德薄  
所致爾若不激發天良何顏對朕若入奏稍有不實是增朕之過  
也稽首籲天夫復何言○乙未申諭嚴催銅運○申諭整頓奉天  
捕務○丙申賽尙阿奏逆匪被困新墟鹽糧將盡初紮竹籐本欲  
由南淶石嘴潛往貴縣鬱林等處勾結因沿河防禦甚嚴十六日  
夜遂放火燒新墟一帶房舍擁眾由大簡翻山奔向鵬化花洲一  
路烏蘭泰知會各路嚴防佛子嶺登喬廟胡村知會李能臣會同

張進修進剿劉長清帶兵赴莫村新墟搜捕後趕由登高廟入山  
烏蘭泰帶兵入黃茅界探知有賊數百至明山將練勇營盤奪占  
遂帶兵進剿賊黨甚眾我兵將至山口賊開數十礮我兵用擡槍  
擡礮下攻前面路已空斷仍由嶺上轟打該匪退回東行我兵用  
擡礮擊斃四五十人內有執旗騎馬者五六人又由村中出賊五  
六百槍礮攻擊我兵後隊從旁橫擊該匪始退兵丁由西邊小路  
魚貫而下繞過山頭路又空斷因用大礮向村轟打賊俱退出山  
頂南北分走忽黃茅界有賊鈔後卽將接應後路兵撤回黃茅派  
兵上西山遙見有賊在山腰伏藏遂畱開隆阿照料又調秦定三  
兵在登高廟接應回至平山官兵飢乏已極暫在黃茅界登高廟  
一帶分紮李能臣王錦繡督帶弁兵練勇跟追將新墟燒燬追至  
新羅逆匪敗走張敬修帶勇至水楓村該匪吶喊而來卽開礮斃

賊數十名賊乘輜重爬山越澗追殺二十餘里至新羅村張敬修  
追趕乘輜賊因山徑崎嶇墜馬傷足知州馮玉衡率勇衝賊後隊  
斃匪二百餘名賊屍內有帶紅風帽黃衣一名黃綢衣黃風帽賊  
婦一名訊被獲僞司馬楊繼涓供稱黃衣賊是僞軍師周錫能賊  
婦是僞女官平南令倪濤在獨峯山帶壯練殺賊數十人各營接  
應轟斃賊百餘人匪分三路分截約數千人壯練退冷水沖會同  
烏蘭泰擊賊副將王錦繡督率遊擊馬福等至羅碧村擊斃賊匪  
二百餘人經文岱自古狼渡河見匪黨滿山僅帶黔兵千名未能  
抵敵巴清德向榮亦遵夜拔營趕至佛子嶺堵截此十七日各路  
追剿情形也十八日巴清德向榮探賊由石門出至思旺會商移  
營橫嶺攔截因雨不能前進該匪七八百人由村內擁出我兵力  
擊該匪敗回因將道路填起魚貫下山忽見風門坳賊五六百人

向我軍放礮官兵紮住平山烏蘭泰兩日殺賊約三百餘名王錦繡等是日殺斃賊匪數十人經文岱帶兵進截正遇賊匪過河官兵槍礮斃賊二十餘人該匪退去我兵追到大旗嶺山徑斗險卽於風門坳分兵駐守此十八日各路進剿情形也二十日烏蘭泰拔營前進探該匪尙有十之三四在山內一路追剿擒斬甚多追至龍街地方紮營張敬修由下窩移營至平南之得勝橋探得該匪由思旺逃竄欲至藤縣巴清德向榮拔營欲移橫嶺前隊均已渡河探報樹林有伏當卽催兵速渡至離思旺墟六七里之官村廟正在紮營賊由思旺傾巢撲來賊匪漸近兵勇開放槍礮斃匪多名我兵亦傷忽松林內衝出一股約七八百人欲鈔官兵之後卽撥兵勇由嶺後壓下開放連環槍礮賊抵死不去楚兵因火藥被雨溼盡不能抵敵退回紮營之處該匪乘勝趕來我軍營盤未

定卽時退走接應之兵亦退該匪復從左邊山梁鈔後兵勇突被數路夾攻猶攘臂大呼四面衝殺巴清德向榮長瑞李伏親衝賊隊千總楊成貴中槍陣亡我兵且戰且退思旺距平南不遠恐賊因我兵失利直竄平南遂暫回平南駐紮鍋帳多有損失俟整理器械再約各路進兵鵬化團練連日殺賊數十人追至蚺蛇界又斃賊二十餘人匪竄出思旺等處此二十日各路進剿情形也二十一日烏蘭泰冒雨前進自尖石頂大山至馬頭山口遙見四處起火隨令屯兵爬上左右兩嶺黔兵從中直出該匪五六百人見我兵上山俱逃回思旺我兵卽至龍門駐紮兩日由山內追出接殺賊匪六十餘名生擒十八名該匪因追兵緊急飛奔驚竄古州鎮李瑞拔營紮佛子嶺嗣又連據探稟賊到界水地方平南藤縣團練先行在水沖內埋伏賊匪一到由兩邊攻擊賊匪敗走大河

水地方屯駐團練殺死會匪十餘名見在烏蘭泰秦定三張敬修等屯紮平嶺其餘各鎮弁兵紮營思旺巴清德向榮暫紮平南大將礮一帶以堵平南要路聞匪有由思旺直竄藤縣和平墟等處之信俟整理器械鍋帳卽拔隊前進臣查該逆匪自新墟焚巢而竄思旺之匪因追捕甚急占踞鵬化七十餘村巴清德向榮繞道截賊前路紮營未穩遽被逆匪衝撲致帳房軍械全被賊掠副將李瑞王夢麟帶兵駐紮古城坳爲賊所必經之路任其免脫經文岱在鄧塘水雖屬兵單乃見賊滿山不敢抵敵均難辭咎應請旨將李瑞王夢麟先行摘去頂帶仍交部嚴加議處帶兵先潰之李伏經文岱交部嚴加議處均責令畱營帶罪立功以觀後效巴清德向榮長瑞亦應請旨交部議處以示懲儆陣亡千總楊成貴請旨交部議卹

上諭內閣寶尙阿奏新墟賊匪逃竄官兵追剿情

形一摺廣西逆匪自竄踞新墟疊經前後兩路官兵進剿該匪勢漸窮蹙焚巢而竄八月十七十八等日我兵分路進剿擒斬甚多並生擒僞司馬楊繼渴訊供僞軍帥周錫能業已殲斃見在該匪由藤縣和坪墟等處逃逸巴清德向榮等截賊前路因屢遇大雨被匪衝撲致有損失李瑞王夢麟帶兵駐紮古城坳經文岱等駐鄧塘水地方李伏管帶楚兵均未能遏賊奔竄之路實難辭咎李瑞王夢麟均著摘去頂帶仍交部嚴加議處李伏經文岱均著交部嚴加議處仍一併畱於軍營責令立功自效巴清德向榮長瑞亦著交部議處仍著會同烏蘭泰等合力兜剿務將竄出各匪併力殲擒毋得再有疏失致干重咎陣亡千總楊成貴著交部照例議卹○諭軍機大臣等寄諭欽差大臣大學士賽尙阿新墟賊匪由藤縣和坪墟竄逸此路可通永安修仁等處爲入省要路該大

臣自應持以鎮靜嚴飭向榮一軍激勵士卒與烏蘭泰等聲勢聯絡或前後夾擊或設伏鈔剿總令該匪奔喘不暇斷其搶掠之路再此時賊匪分竄勢已渙散正可乘此機會立懸重賞設法擒縛逆首數人則賊膽自落其勢更易解散所募福勇潮勇卽飭趕緊招募精壯者數千以資堵截總兵德亮等業已革職著仍遵前旨畱營效力匪首顏品瑤是否已被殲戮李士青等見在如何設法擒捕均卽查明具奏該大臣務當相機妥籌嚴密布置毋得再有疏失以副朕望至軍餉已飭戶部續撥一百萬矣將此由六百里諭令知之○諭前據楊以增奏豐北三堡黃流漫溢朕心實深焦灼著瑞常於場事完竣後回京路過徐州卽前往豐北一帶訪察該處漫口是否實係無工處所究係何員貽誤所報口門塌寬一百八十五丈是否屬實見辦裹頭已否完固其民田廬舍淹浸若



干被水居民如何安撫沛縣一帶村莊被災尤重見在情形如何  
饑民眾多有無匪徒乘機搶掠滋生事端陸建瀛計已馳抵工所  
見與楊以增如何籌畫經費覈實辦理至河流串入運道於回空  
漕船果否無礙以上各情節著瑞常逐一詳細查明迅速由驛具  
奏以慰朕念楊以增先後奏到摺片並諭旨二道均著鈔給閱看  
將此諭令知之○允孫葆元回籍侍親轉趙光爲兵部左侍郎以  
何桂清爲兵部右侍郎署吏部左侍郎○丁酉阿勒清阿以病免以恆春  
爲刑部尙書由察哈爾都統遷○戊戌諭軍機大臣等有人奏前任湖南  
巡撫陸費瑑在任時貪贓賣缺以巡捕蔡鼎新王逢吉爲腹心致  
佐雜人員爭先進賄知縣張宗世俞舜欽俞會昌皆有賄賂情事  
等語湖南吏治廢弛總由大吏表率無方前因程裔采奏參前任  
藩司萬貢珍道員呂恩湛已照部議革職並諭該督查辦若如所

奏是萬貢珍等未能整頓未必非陸費瑋爲之厲階著程喬采按  
照摺內所稱逐款訪查如有前項劣蹟據實具奏毋稍徇隱原摺  
著鈔給閱看將此諭令知之○武棠以病免以聯英爲江蘇布政  
使調查文經爲江蘇按察使以楊培爲福建按察使由江西糧道遷○命  
查文經隨同兩江總督陸建瀛辦理豐北河工○庚子諭內閣軍  
機處爲絲綸重地滿漢章京繕寫諭旨允宜慎重考選嘉慶年間  
迭奉 仁宗睿皇帝諭旨令各衙門堂官於司員中書筆帖式擇  
其人品端方年力富强字畫端楷者出具切實考語保送並限其  
額數又定濫保處分 聖訓煌煌永垂法守見當保送軍機章京  
之時著各該堂官認真揀選必須先取人品並察看年力文字照  
例咨送毋許徇情冒濫軍機大臣傳集考試著將試卷彌封公同  
校閱擬定次第帶領引見候旨記名如該員等充補之後怠惰不

職卽咨回原衙門當差儻查有舞弊營私劣蹟卽著該大臣等據實嚴參朕必寬其失察之咎如徇隱姑容經朕查出惟該大臣等是問並將濫保之各衙門堂官一併議處該章京等內廷供職向例覈其勞績甄敘從優當如何砥礪廉隅以圖報稱嗣後各宜倍加謹飭於一切交遊書札均須慎密毋得仍蹈積習致干重罪○諭常大渎奏海塘埽石各工衝缺請將承修員弁革職畱任勒令賠修一摺浙江海塘因八月內連日風潮猛烈先後坍卸石塘計駒字號二丈零食字號二十丈場字號四丈其柴埽各工亦俱坍塌見在口門業經堵合著卽將石埽各工趕緊接續修復以資抵禦該廳管各員原辦工程未能堅固實難辭咎杭州府西塘海防同知馬椿齡海防營守備夏德風均著革職畱任勒令賠修見署西塘海防同知仲孫樊未能先事籌禦杭嘉湖道舒化民疏於防

範均著交部分別議處○壬寅賽尙阿鄒鳴鶴奏據探賊竄永安代理知州吳江督率兵壯嬰城固守設伏斃賊多名因援兵未到遂於初一日失守文武均已陣亡前因新墟賊竄疊經臣賽尙阿飛札巴清德向榮烏蘭泰等緊躡賊蹤雖軍械不齊亦當趕緊前進乃屯守平南稽延時日烏蘭泰追至麻油坪地方及賊後隊探知賊匪前隊盤踞大旺墟另一股分往南行此間路徑分歧可通藤縣永安巴清德向榮欲令劉長清帶兵前赴修仁荔浦一帶堵截烏蘭泰尙恐兵單因令李能臣同往探知該匪已竄至藤縣之太平墟烏蘭泰因由山繞路迎戰二十八日拔營知有翻山水路可通永安隨路開鑿行七十餘里至豆田翻山越嶺至馬林市初一日入三江峽藤洞峽等處過六梅嶺酉刻接永安州飛稟州城被圍催隊急行初二日至夏宜村正在造飯忽探該匪已破永安

因帶已到各兵前進趙至離州城十餘里之文墟地方聞水竇仍有賊踞遂起築營壘探得賊見踞州城並莫家村衛龍村及水竇等處自花祿翻山至此三百餘里馬不堪行烏蘭泰每日徒步二三十里實爲勞瘁續據開隆阿江忠源等飛稟自初二日紮營文墟初三日因礮械未到稍爲休息初四日烏蘭泰急不能待帶領屯兵向永安州城前進行至佛子村距水竇僅八九里聞該匪有一千餘人在水竇恐我兵全往州城該匪來鈔我後畱兵令經文岱暨江忠源在佛子後嶺駐紮以防水竇烏蘭泰暨開隆阿秦定三率兵前進行至佛子村中間倏見該匪八九百名由圖嶺蜂擁而至被我兵擊退乘勝追過圖嶺城內暨水竇之賊約二千餘人從兩旁鈔來我兵奮不顧身將鈔出之賊擊敗直追至永安南關該匪逃入城中踞守先後擊斃該匪七八百人生擒十一人烏蘭

泰雖未趕及而連日翻山疲苦且已獲有大勝尙屬可原巴清德向榮因損失軍械未能刻卽拔追致該匪四竄咎實難辭應請旨交部嚴加議處仍畱軍營帶罪圖功目下省垣集團募勇以固根本一面飛調湖廣官兵千名前來防剿李能臣劉長清已到修仁一帶臣賽尙阿飛札卽往會剿復因南太匪首顏品瑤已經殲斃省城緊要已將前遣赴南太之兵調回臨桂鄉團統計五萬餘人均極整齊省城可保無虞各州縣團練均由在籍侍講龍啟瑞御史朱琦及其弟前刑部主事朱壽康董率可資得力將來巴清德向榮之兵復行整頓添募潮勇趕到可剿分竄各匪若以鄉團截其前兵勇追其後使無駐足之所似亦無難撲滅至永安州城文武如何殉難情形容俟查覈詳確奏請恩卹又奏右江道張敬修抵華錦村探知該匪屯聚大黎距華錦村十數里旋據報稱該匪

分股各一、二千人逃竄三江口及藤縣屬之太平墟餘匪及首逆等三、四千人已先由大黎入永安州境仍有留大黎者二十九日復報該匪紛紛他適據署潯州府張其瀚稟報逆匪自竄入永安州城後分作三起一在距平南百里之大黎水一在距大黎水九十里之榕樹江口一在距榕樹江口三十里之太平墟巴清德於閏八月初一日起程由平南至太平墟向肇亦於是日起程由平南至濛江張敬修在大崗村駐紮等情張其瀚擬初二日會同進剿臣查該逆自新墟逃竄勢已窮蹙惟因永安兵力太單適當該逆分竄大兵尾追不及據守三日力盡城陷卽巴清德烏蘭泰向榮等連日分投追躡亦並無觀望退縮情弊實因各處山路分歧險窄難以趨行見在賊之大股及首匪多在永安州城各路兵勇陸續到來正可聚而殲旃第事機屢變之後臣恐逆首潛逃及餘

黨分匿急切不能剋期掃盡亦屬可虞 上諭軍機大臣等賽尙  
阿奏新墟賊匪竄入永安州城我兵繼至且追且擊該匪逃入城  
中閉門據守見在巴清德向榮烏蘭泰等均已督帶各路兵勇先  
後追至務當嚴密堵禦四面圍攻城中賊匪是否有逆首在內尤  
須探明設法殲擒再據賊供洪秀泉有乘小舟欲駛出濛江口之  
信濛江偏近藤縣係東通梧州水路該大臣已飭劉繼祖湯俊等  
及防河各委員嚴密堵截此股逃匪七八百人船礮俱備且有逆  
首等在內務須加意嚴防設計擒剿劉繼祖等是否可靠所帶兵  
勇是否足恃朕心實深懸念至賊匪分竄各路往往乘虛而逸是  
該匪探知我兵情形甚熟而賊中消息我兵轉未能得其確情用  
兵之道偵探爲先何得如是草率見在首逆韋政等如何分竄某  
首匪在某處亦未詳細聲敘所謂知己知彼者安在耶所調湖南



兵一千名見在是否趕到足資防剿其先調之楚兵日久疲乏者或卽汰回或換令防守不可強使當先反致誤事此一節務須慎密斷勿稍有漏洩致滋解體新墟一帶賊巢旣已焚毀其零匪是否剿淨聞逃匪有怨恨思散之言若能設計誘將首逆縛獻則餘黨更易剪除賽尙阿自抵軍營以來凡遇奏報勝仗著有勞績朕無不優加賞賚卽巴清德向榮等亦均屢有恩施見在賊匪仍肆猖獗攻破城池該大臣等當如何知感知愧力圖報效以贖前愆耶將此由六百里諭令知之○賽尙阿奏永安賊匪擊敗被圍得旨逆匪被困正可聚而殲旃勿令一名免脫至洪秀泉等欲由水路潛逃尤應嚴密防範若首逆未能擒獲止殺餘匪以塞責朕惟知將賽尙阿重懲不貸懷之○以永安被陷欽差大臣大學士賽尙阿下部議處革提督向榮都統巴清德翎頂○乙巳諭內閣程

喬采奏粵東竄入股匪經楚粵兩省會剿殲擒多名一摺前撲宜章縣邊卡之粵匪擊退後逃至乳源交界之容家洞參將積拉明阿等分路上山腹背夾攻斃賊不計其數該匪逃至曲江隴歸墟復經南韶鎮崑壽先後殲擒百餘名該匪等經兩省合力剿捕餘黨無多所有廣東湖南毗連之處仍著程喬采飭令鎮道會同廣東文武探蹤搜捕務期殲除淨盡不留餘孽守備趙鴻賓前攻思仁坳身先士卒奮勇被戕情實可憫著交部從優賜卹陣亡兵勇一併照例議卹○諭軍機大臣等前因廣東股匪竄撲湖南宜章縣邊卡當降旨飭令徐廣縉葉名琛派兵兜捕本日據程喬采奏此股賊匪經湖南官兵在容家洞地方攻剿殲擒多名餘匪仍竄回粵東又迭被粵省官兵剿捕屢有擒獲等語仍著徐廣縉等督飭地方文武將此股逸匪搜捕淨盡勿留餘孽前飭查拏沙包會

匪楊得魁等並著嚴拏務獲再粵西新墟會匪竄逸逆首洪秀泉有由水路東下之信永安藤縣接連梧郡爲東西兩省孔道徐廣緝遠駐高州葉名琛在省務須添派弁兵嚴守肇慶儻匪徒竄近梧州悉力堵禦勿令順流東下是爲至要將此由五百里諭令知之○諭程喬采奏酌撥永州防兵一千名馳赴廣西省城以資捍衛並另調各營兵丁補防等語湖南永明江華等處與永安州相近見在廣西大兵圍攻永安難保餘匪不乘間逃竄楚境且新甯城步亦與廣西壤地毗連各該處派兵設防是否不至單薄該督移駐衡州是否堪資策應不至鞭長莫及提鎮帶兵分駐之處是否扼要著與駱秉章悉心籌畫督飭文武加意巡防勿任鄰省餘匪竄入句結將此由五百里諭令知之○前任刑部尙書阿勒清阿卒予祭葬諡愨愨○丙午諭軍機大臣等陸建瀛奏豐北漫口

情形一摺並片陳徐屬民情等語此次全河北趨由沛縣之華山  
戚山分注微山昭陽等湖挾清水外泛運河牐壩絳隄均已漫淹  
見在同空軍船銜尾南下不能片刻停留應如何急籌宣洩俾運  
道緯隄涸出回空可以無誤其豐沛銅山碭山各縣及毗連山東  
境內災黎蕩析離居不堪設想據該督奏稱酌提銀兩分飭該管  
道府縣撫恤並捐廉倡率以資接濟能否不致流離失所俾逃亡  
者可以次第復業著該督等趕緊設法飭屬妥爲辦理並移咨山  
東一體實力安撫不得令庸劣屬員諱飾侵漁致滋流弊徐屬民  
情强悍尤當隨時查察有無匪徒乘機搶掠或勾結饑民致釀事  
端查文經到工尙需時日該督等卽行飭屬勘估工需將見在籌  
辦情形迅速具奏以慰朕懷至楊以增前奏請撥來年歲料銀兩  
摺已交戶部議奏矣將此由四百里諭令知之○丁未諭軍機

大臣等據徐廣縉葉名琛奏暹羅國王先後奉到 孝和睿皇后  
宣宗成皇帝遺詔遣使進香又齋遞表文方物慶賀登極並因  
例貢屆期將貢物一併進呈等語上年七月內據鄭祖琛奏越南  
國王遣使進香當經降旨以 孝和睿皇后梓宮已於三月內奉  
移 山陵 宣宗成皇帝梓宮亦擇於九月內奉移 慕陵該國  
王遣使進香已在奉移之後不及恭薦諭令不必遣使遠來其慶  
賀登極方物亦無庸呈進今暹羅國遣使進香更在期年以後著  
徐廣縉等卽傳知該國使臣毋庸來京所有呈進儀物方物著該  
使臣齋同至應進例貢見當國制二十七月之內不受朝賀並停  
止筵宴著俟該國嗣王恭請敕封時一併呈遞該督等卽行文該  
國遵照可也將此諭令知之○軍機大臣大學士祁寯藻等會議  
申明奪佃增租例禁請飭直隸總督順天府府尹將各屬新編莊

頭詳查坐落州縣及舊係某莊頭退交之每畝原租並見在官租實數一併分晰開造咨報戶部內務府以憑查覈其新莊頭已領一錢以上之地者租項永遠照數徵收與舊莊頭數目相等以免日後莊佃抗租之弊其一錢以下之地業已報明戶部者亦卽令新莊頭照見徵租數收取內務府計畝收租新舊佃戶俱毋得藉詞妄希輕減至尙未議租報明戶部者見已令該督暨府尹飭屬一律詳查退交原租並見徵租數覈實定議不得擅行輕減亦不得任意取盈迅卽造報以便莊頭照議收租交產其佃戶自二十九年抗欠租項不交者應檄飭各該地方官查明如何抗欠分別辦理嗣後遇有莊頭誤差被革遵照內務府奏定章程退交地方官令該州縣按革退莊頭原租徵收待內務府派員牌取以昭覈實而重差項如仍有佃戶抗欠莊頭勒增以及書吏勾串等弊或

控告到部或被內務府查出一經審實卽照定例分別治罪從之  
○免江西省道光二十九年以前未完銀米○戊申諭內閣顏以  
燠奏湖河漲漫籌辦回空漕船一摺山東省微山等湖因江南豐  
北漫口黃流下注普漫隄頂一片汪洋當此回空軍船銜尾南下  
之時亟應妥籌宣洩著東南兩河總督各就地方情形督飭該道  
廳趕緊設法疏消俾下游暢達漫水漸退庶回空可以無礙其運  
道湖河相連處所據顏以燠奏設立水站多雇緯船插標導引漕  
船當可一律暢行不至誤入歧途轉多周折若能迅籌分洩清出  
緯道更爲穩妥至被水災黎蕩析離居尤堪憫惻著江南山東各  
督撫趕緊飭屬妥爲安撫並嚴緝匪徒毋使藉端滋事○諭軍機  
大臣等前因俄羅斯使臣來赴伊犁會議貿易章程當經降旨飭  
令奕山布彥泰將一切未盡事宜再行妥議具奏茲據國子監祭

酒勝保奏請思慮豫防嚴定限制等語所有通市日期該將軍等  
前奏每年清明後入卡冬至節停止又稱限內貨物如未賣完仍  
聽該國商人居住售賣完竣飭令旋回據該祭酒所稱恰克圖章  
程自十一月開卡來年二月閉卡平時卽不通往來之處可否仿  
照辦理抑係伊犁塔爾巴哈台兩處情形與恰克圖不同其入卡  
人數貨物前奏由卡倫官員點驗但未限定數目該祭酒稱恰克  
圖交易之時夷商運貨至圍城者總不得過二百人事竣卽行出  
卡不准稽留所以久安無事是否亦可仿行著奕山布彥泰一併  
妥爲籌計悉心擬議具奏總期防患未然經久無弊原奏片著鈔  
給閱看將此諭令知之○直隸總督訥爾經額奏閩伍回道經  
都門懇請入覲得旨卿自勉力爲之不在虛文勿得惑於習俗以  
多見幾面爲榮著毋庸前來○己酉賽尙阿奏據烏蘭泰等報閩



八月初六日出隊至國嶺遙見莫家村有賊派令副將和福等帶兵在松嶺後埋伏侍衛開隆阿等帶兵在新村秦定三等隨同接應該匪遙擁而來烏蘭泰令旗兵放火箭正中賊隊乘勢而進該匪稍退西山上賊齊撲而下屯兵突出連槍攻擊該匪紛紛倒斃同時黔兵滇兵用連環槍將山根賊擊敗中路之賊被湖北兵及屯兵擊退惟莫家村賊隔河抗拒不退東南之賊鈔來我兵登時擊退該匪兩股合一用大礮向我軍轟打經文岱接應秦定三等勇氣倍加斃賊無數內有一紅衣黃帽賊騎馬指揮督戰我兵將紅衣賊擊斃眾賊大亂我兵乘勢過河該匪大潰追殺到城該匪閉城不准敗匪退入多被殺死大獲全勝又據潯州府張其瀚稟逆匪由大旺墟竄至藤縣之大黎里平南令倪濤督團於八月二十八日追至上坡村見有賊船三十餘隻沿河賊匪千餘隨卽開

放烏槍交戰時許斃賊百餘旋有騎馬執旗賊目率賊擁上經武舉廖淩漢等奮勇直前砍倒賊目二人殺斃數十人賊勢怯敗走適藤縣三江口團練截擊餘匪棄船逃逸署藤縣張鵬萬率團總前山西知縣卓希泰於二十九日由三江口截殺該匪二十餘人旋調各處團練五千餘人眾心更壯當卽分撥追剿探得逆匪洪秀泉欲出濛江赴廣東隨卽密飭生員覃瀚元率練在三江口蚬蛇嶺旁埋伏初二日匪船十三隻先到用礮擊沈五隻該匪攏岸逃走壯練奮勇上船斬首十餘級餘船仍從上游駛回其大坡壯練初二日與匪打仗生擒匪黨十餘名該匪不敢拒敵直竄永安州官軍復緊追至麻油村四面兜擒礮傷該匪無數臣查此股賊匪三路竄擾其濛江一路已爲倪濤張鵬萬擊沈船隻連日追殺全行竄回永安初四初六等日烏蘭泰又連獲大勝連次飛催向

榮前進已於初十日拔營趕赴昭平堵遏並圖進剿永安又疊催劉長清李能臣迅速拔營逼近州城見探該匪於初六日夜在各要隘趕造木壘礮臺爲踞守昭平之計我兵四路會齊當亦無難得手署藤縣知縣張鵬萬連日獲勝實屬奮勉應請免補本班以同知直隸州知州卽行升用並賞戴花翎六品軍功生員覃瀚元殺賊受傷應請以府經歷縣丞儘先選用並賞戴藍翎平南縣知縣倪濤擒斬多名應請旨交部從優議敘又奏十一日烏蘭泰出隊設伏水竇以兵誘敵該匪五六十分路攻撲引至圖嶺我兵大隊由嶺後突出槍礮齊發殺斃二三百名逆匪仍退歸木寨水竇賊一千餘名乘虛欲撲我營東面伏兵將出該匪一股由嶺北鈔後一股直奔圖嶺欲截歸路均經官兵擊敗至收兵時秦定三勝受鉛子傷猶督兵力戰鎮將弁兵等無不倍加奮勇復獲大勝又

奏

臣

自到粵西迄今三月所調兵勇不爲不多乃自新墟圍困功

敗垂成致該匪焚巢竄越總由兵不齊心以致尾追不力向榮一

軍又復因雨致挫頓兵平南十餘日始能拔隊起程惟恃烏蘭泰

一軍翻越追逐又因轉餉爲艱難於迅速遂致永安失事查各路

官兵疲頓已久計尙可出隊者不過十之五六而師老力竭亦復

難期得力添募撤換勢固不得不然至各處鄉團實可以資保障

目前之局若四路合攻非不可剋日蕝事然添募兵勇賞犒鄉團

需費實難豫計糧臺所存僅數月餉惟廣東關稅一款未解到者

尙有六十萬餘兩而隨徵隨解亦恐緩不濟急惟再乞諄飭部

臣

寬爲籌畫陸續接濟俾免停兵待餉之虞各營鎮將亦已疲乏查

有河南河北鎮總兵董光甲湖北鄖陽鎮總兵邵鶴齡湖北鎮標

遊擊胡定國均屬有用之才請飭下各該督撫轉飭該鎮等各帶

親信官兵二三百人迅速來粵以資調遣 上諭軍機大臣等賽  
尚阿奏官兵續獲勝仗擊斃竄匪多名一摺又片奏獲勝大概情  
形賊匪分作三路竄擾其濛江一路已經壯練擊沈船隻竄回永  
安見在賊首洪秀泉等是否與聿政等俱竄入永安城內抑係分  
竄他處務須偵探確實設法誘擒無令免脫用兵之道在於善用  
閒謀卽如顏品瑤一股經壯目張鴻才投充匪夥卽能知賊舉動  
殲其渠魁見在賊匪大眾聚入永安州城所有城內被脅良民自  
復不少正可乘機設法密委有膽有識者潛入城中探悉賊情或  
設伏誘擒或與城內被脅紳民密相要約以爲內外夾攻之計則  
勦擒更易得手諒該大臣必能早見及此也再據單開獲犯供詞  
有太平王坐轎進城大頭人俱住城內之語究竟係何頭目是否  
卽係聿政擒其渠首則餘黨自易解散又據供稱羅大光被官兵

擊敗後有欲走修仁荔浦之信更須嚴飭各路將官或合力堵截或乘機設伏誘而殲之全在該大臣設計用閒俾賊匪一舉一動無不豫知庶乘機應變自不難於一鼓蕩平也勉之望之將此由六百里諭令知之○命河南河北鎮總兵官董光甲湖北鄖陽鎮總兵官邵鶴齡馳赴廣西軍營○以拏獲河南泌陽縣擒首喬建德予總兵官圖塔布道員鄭敦謹議敘○以勦斃廣西匪首顏品瑤予布政使勞崇光優敘賞守備張國樑花翎餘升擢有差○以勦辦永安平南藤縣等處賊匪獲勝賞副都統烏蘭泰黃馬桂餘獎敘有差○庚戌諭內閣漕糧爲天庾正供近來重運漕船不能如期抵壩以致回空歸次兌收新漕節節耽延本年幫船北上迭據該漕督稱運河水勢充盈行走較爲順利惟南河豐北漫口黃流下注屢經降旨飭令東南兩河總督妥籌宣洩諒可無礙漕行

見在節近霜降亟應嚴催回空幫船趕趨歸次庶於來年受兌新漕不至有誤著漕運總督嚴飭起卸空船卽日連檣南下不准片刻停留並著東河南河總督及有漕各督撫分飭地方官嚴切催提及早歸次來年新漕尤當趕緊辦理按限兌開於四月初十日以前催抵清江剋期渡黃毋許稍有延誤儻意存息玩仍於例限有逾定將該漕督及各省督撫嚴行懲處決不寬貸將此通諭知之○諭軍機大臣等據花沙納等奏棍徒把持倉務請旨拏辦除將該犯姓名交步軍統領等衙門查拏外著派舒興阿趙光迅卽前赴萬安倉將該倉東廠潛宇宙字西廠張字麗字盈字等廠查明見存陳黑稔米土米豆石並將私造小斛起出奏明辦理將此諭令知之○諭常大澶奏浙江石浦洋面探有廣東夾板船十二隻攜帶礮位家眷查訪均係廣東人氏口操粵音在洋游駛擄人

勒贖經各幫師船圍捕匪船南竄等語盜船肆擾必應併力兜拏著徐廣縉葉名琛洪名香督飭水師鎮將帶領弁兵於該省洋面嚴密巡防如有匪船竄入卽著痛加剿洗悉數殲擒並確查該盜船來自廣東何處務須根究盜窩徹底懲辦勿畱餘孽將此由五百里諭令知之○諭據常大清奏七月間接兩江咨會洋盜巴搭駕船十餘隻欲在浙省之普陀山設壇打醮當卽飭屬嚴拏旋據詳報石浦洋面探有大小廣東夾板船十四隻攜帶礮位家屬皆廣東人口音詭稱係黃富興雇募前赴山東往北駛去見復探有大小廣東夾板船十二隻在洋游駛並擄捉商船水手勒銀取贖已調集各鎮將督帶師船兵勇前往圍剿又片奏知府羅鏞招募漁船多隻由外洋駛往石浦於閏八月初三日隨同師船將盜船圍剿盜船紛紛南竄見飭官兵迅速追捕並分咨兩江閩粵水師



一體堵拏各等語洋盜擾害商船亟應痛加剿洗該匪見由石浦  
紛竄洋面遼闊必須各路兜剿方能得力著陸建瀛楊文定季芝  
昌王懿德善祿鄭高祥督飭水師將弁分投截擊並飭陸路員弁  
嚴加防範務期悉數殲擒勿任一名漏網至浙洋盜船僅十餘隻  
該省招募漁船有一百二十五號之多加以鎮將所帶水師船兵  
力不爲不厚何竟任其免脫著常大洹查明在事文武如有畏蒞  
遷延情事嚴參懲辦並嚴飭鎮將等管帶兵勇跟蹤追捕毋令遠  
颺各督撫提督等惟當不分畛域認真督辦務使盜氛盡熄以靖  
洋面而安商旅將此由四百里各諭令知之○諭廣西賊匪竄擾  
見在大兵雲集所需兵餉尤關緊要朕心甚爲懸念前經降旨准  
撥廣東關稅銀兩並戶部籌撥廣東各款著徐廣縉葉名琛按照  
所撥銀數星速解赴廣西軍營以濟要需此外正雜各款並閒款

內有可以通融協濟之項著該督撫悉心籌畫寬爲儲備並著傳諭曾維於關稅應解項內無論何款酌量豫備一面奏明一面知照賽尙阿如有急需卽行飛咨調撥見在南河又出鉅工經費更形支絀廣東剿辦匪徒雖亦在需費之時惟與廣西毗連緩急尙可相濟想該督撫等必能仰體朕意先其所急也將此由五百里諭令知之○辛亥諭內閣前因王懿德奏甘肅士民呈控番賊擾害等情當令薩迎阿妥爲查辦據實覆奏茲據該署督逐層聲覆其派兵前赴打坂地方賊已竄逸無從接仗一節何以不行入奏已屬有心回護且諭令呈控番匪之廩生李國棟等各安生業並飭協同訪躡試思該紳民等累被番賊擾害搶去牲畜有何生業可安且自保身家不暇又何能協同訪躡奸匪該署督於特旨交查之案辦理如此草率實屬老悖昏庸薩迎阿著交部議處仍著

將此案認真查辦並嚴飭該鎮道等隨時實力緝拏毋稍疏懈儻  
仍玩視捕務卽著嚴參懲辦○諭此案著派戶部侍郎王慶雲會  
同倉場侍郎及稽查萬安倉御史將該倉潛字張字麗字盈字等  
廠見存土米並陳黑稜米若干石逐一盤查其因何存贖及未經  
報明之土米並廠座門板因何短缺均著查明緣由據實具奏所  
有該倉經手花戶人等著倉場侍郎送交刑部審訊起出小斛八  
張平斛一張一併交部查覈辦理○諭軍機大臣等薩迎阿哈勒  
吉那會議察漢城蒙古防兵仍請裁撤並右翼郡王仍暫居永安  
一摺據稱今昔情形不同籌議斷難執一不得不通權酌辦以安  
眾蒙古之心所有蒙古駐防兵丁仍請裁撤擬畱盟長各官蒙古  
右翼郡王仍請暫居永安俟二年後卽令搬回原牧等語事關變  
易舊章且係邊防要地尤宜慎重著舒興阿到甘肅後悉心體察

通籌籌畫再行覈議具奏薩迎阿等原摺及蒙古郡王等呈詞印

結二件均鈔給閱看將此諭令知之○召薩迎阿來京以舒輿阿

署陝甘總督

由戶部左侍郎署

○壬子諭內閣陳慶偕奏審明戰船被賊

占駕及登岸滋擾各情請將怯懦無能之文武各員分別治罪嚴

議一摺山東榮成縣石島洋面係該副將鄭連登專管乃於捕賊

機宜毫無把握任聽遊擊韓進忠聯船退守臨時又不能激勵兵

勇設法抵禦以致戰船被賊占駕關防遺失實屬怯懦無能除韓

進忠業經畏罪自盡外水師文登協副將鄭連登著卽革職發往

新疆效力贖罪著福山縣知縣張濟第文登右營都司德亮各帶

兵勇防守煙臺口岸於賊匪登岸不能堵禦輒行退守以致賊匪

擄人勒贖土匪乘機搶奪亦非尋常疏防可比著一併交部嚴加

議處守備葉國棟年力已衰不堪驅策著卽勒令休致○諭軍機

大臣等昨因盜船在浙洋被勦紛竄諭令沿海各督撫合力堵拏務獲懲辦茲據陳慶偕奏稱訪知賊目鮑亞北陳成發陳華勝吳維馨羅新全係廣東香山順德新安等縣人又有賊目陳姓係福建人並聞該匪等銷贓聚會俱在廣東香山縣之澳門香港及浙江之石浦溫州等處其船內多帶私貨難保不僞爲商船赴各處口岸銷售見飭令守備黃富興帶領師船跟蹤追捕等語著陸建瀛楊文定季芝昌王懿德常大瀄徐廣縉葉名琛督飭水師將弁嚴密巡查並飭陸路將弁一體防範儻查有盜匪攜帶私貨假充商旅立即捕拏毋令冒混至守備黃富興見帶原雇粵勇駕駛戰船二隻艇船七隻跟尋盜蹤南往追勦第恐兵力稍單必須各路接應方能聲勢聯絡著各該督撫飭令水師將弁各於洋面巡探如見黃富興追勦盜船卽督帶兵勇協力殲擒勿使遠颺見在山

東盜船雖已聞拏回竄惟賊未捕獲著陳慶偕仍嚴飭鎮將等實力巡防勿稍疏懈將此由四百里各諭令知之○諭徐廣縉等奏進剿凌十八等各股匪徒情形一摺據稱凌十八自迭受挫衄以後該督復飭兩路兵勇三次進剿皆已獲勝因該匪恃險固守致未能立時攻破賊巢其何名科一股仍入信宜縣境見以兵力尙單添調兵勇合剿等語著徐廣縉葉名琛嚴飭各路帶兵文武相機設法迅將凌十八一股剿滅卽移兵信宜縣境務將何名科與梁二十大等匪黨悉數殲擒勿畱餘孽至該督等奏稱有湖南桂陽縣匪徒朱幅隆譚幅糾約廣東匪徒李啞仔鄧叫古馮房長等分股滋擾共有六七百人經總兵崑壽南韶道祥和等先後將李啞仔鄧叫古拏獲並經各路兵勇將馮房長一併生擒見在廣東首要各犯均已擒獲惟湖南起意爲首之朱幅隆譚幅等是否拏

獲未據該省奏報著程喬采駱秉章督飭該省文武迅速查拏按名弋獲無任兔脫致復勾結爲患並著廣東湖南各督撫於兩省交界地方嚴飭帶兵員弁並各縣營務當不分畛域合力兜緝勿令此拏彼竄以期力淨根株將此由四百里諭令知之○是月免福建各場竈地積年未完額課湖南澧州等十一州縣暨岳州衛積年額賦武陵等五縣未完修隄銀米